

LVDOVICI
DEMONTIOSII
GALLVS
ROMAE HOSPE S.

Vbi multa antiquorum monimenta explicantur,
pars pristinae formae restituuntur.
Opus in quinque partes
tributum.



ROMAE

Apud Ioannem Osmarinum. M. D. LXXXV.

Cum Priuilegio, & Superiorum permisso.

IVDOVICI

MONITORII

GALLVS

ROMAE HORREI

Attestationem monitorii ex officio
et per litteras in litteris
Quintus et per litteras
in litteris.



ROMAE

Attestationem Monitorium. M. D. LXXXV.

Sancti Spiritus, et Spiritus in litteris.

S. D. N.
X Y S T O Q V I N T O
P O N T I F I C I M A X I M O .



VM tibi in dies viri primarij, & ciuitates, & populi certatim pontificatum gratulentur, ridiculum videri possit, in tanto gratulantium concursu hospitem ignotum nomen suum profiteri. Atqui ego non tibi gratulor, cui nihil præter curam, & sollicitudinem accessit; sed virtuti, & reipublicæ Christianæ. Illi, quod ei hoc quantūcunque est, totum acceptum ferendum sit; non fautoribus, vt veteri verbo vtar. huic verò, quod pastorem eiusmodi nacta sit, qui periclitantibus rebus, & cauere, & subuenire possit. Ijs inquam gratulari volui, & id ipsum publicis quibusdā monimentis testari. Itaque cum essent præ manibus nobilia quædam priscorum argumenta, temporis quondam sacrata, quæ ego ante aliquot dies, dum antiquæ huius tuæ vrbs monimenta lustro, ab ipsius temporis iniuria vindicare tentaueram, ea nunc denuo vtcunque restituta, quod reipub. Christianæ fœlix, faustumque sit, meliore ritu Deo optimo maximo, qui tempora moderatur, vt te diu incolumen seruet, sacro, dico, dedico.

Sanctitati vestre

Deuotissimus ser.

Lud. Demoniosius.

INDEX EORVM, QVAE IN SINGVLIS huius operis partibus con- tinentur.



IN PRIM^A, anni veteris rationes explicantur, & eius symbola. De pyramidibus. De obeliscis. De Iano bifronte. Cur ei portæ geminae attribuerentur. Variæ eius formæ, & de earum significatione in re numaria. Quid in numis bigæ, & quadrigæ significarent. Arcus Iani pristinae formæ restituitur, & in eo recondita quædam explicantur. Iani symbolum cur sepulchris ad-
poneretur. Cur item in Circo. Septizonium pristinae formæ restituitur, & ar-
cana eius explicantur.

IN secunda, quæ est de Pantheo, & symmetria ædium sacrarum, Caryati-
des eius templi indicantur, & locus ubi quondam sitæ fuerunt. Panthei
symmetriam, ut nunc est, vitiosam esse. Quid in eo de antiqua forma mutatum
fuerit. Quomodo pristinae elegantia restitui possit. Quid sint Scamilli apud
Vitruvium. De porticu panthei. De symmetria corporis humani. De octa-
stylo Hermogenis Vitruuij locus explicatus, & emendatus. Quid apud eun-
dem Tholus, quid Pyramis, quid Flos, ubi multi recentiorum errores ad-
notantur.

IN tertia, ubi de veterum sculptura, de calatura & gemmarum scal-
ptura, &

IN quarta, quæ est de pictura, Plinius pluribus locis emendatur, & illustra-
tur. Explicatur etiam nobile illud de pictura certamen inter Apellem, &
Protegenem.

IN quinta, quæ est de foro Romano veteri, notantur errores recentiorum in si-
tu arcus fabiani, Putealis, Comitij, ficus ruminalis, rostrorum veterum,
curiæ hostiliæ, & Græcostasis. Vbi sita quondam fuerit celebris illa basilica
Pauli. Vbi stationes municipiorum.

XYSTVS PAPA QVINTVS.

Ad futuram rei memoriam.



V M, sicut accepimus, dilectus filius Ludouicus Demontiosius Gallus in Vrbe Hospes ad communem vsum, vtilitatem, & commodum vnum opus in quinque partes distributum, sub titulo Ludouici Demontiosij Gallus, Romę Hospes, vbi multa antiquorum monimenta explicantur, & pars pristinae formę restituuntur, hactenus non excussum, nec in lucem editum suis non paruis vigilijs, & lucubrationibus composuerit, & in lucem ediderit, illudque propediem typis dare, & excudi facere desideret, dubitetque tamen, ne huiusmodi opus antequam forsitan, vel postquam totaliter impressum fuerit ab aliquibus alijs quam sibi beneuensis Impressoribus lucrum ex alieno labore querentibus sumpto inde exemplo tam in nostra Romana Curia, quàm in alijs Ciuitatibus, etiam Sedi Apostolica mediatę, vel immediatę subiectis licentia ab ipso Ludouico minime requisita, & absque illius voluntate imprimi, & impressum vendi contingat, quod in non modicum dicti Ludouici preiudicium, & damnum vergeret. Nos igitur dicti Ludouici precibus annuentes, & illius indemnitati, aliasque in premissis opportune providere volentes, illiusque in hac parte supplicationibus inclinati, eidem Ludouico, ne quis dictum Opus Ludouici Demontiosij a decem annis post impressionem dicti operis, a quocunque quauis ex causa seu quesito colore, ingenio, vel fauore, absque expressa ipsius Ludouici licentia, seu voluntate imprimere, vel imprimi facere, figurae sue in eodem opere existentes, aut quę ab eodem Ludouico seorsum edentur in lucem, ære aut ligno excidere, vel incidi facere, illudque & illas vendi, seu venale, & venales tenere, vel proponere possit, nec valeat auctoritate apostolica, tenore presentium concedimus, & indulgemus. Inhibentes omnibus & singulis vtriusque sexus Christianis fidelibus, vbiq; locorum tam in Italia, quam extra Italiam, in Terris Sedi Apostolicae mediate, vel immediate subiectis existentibus, & precipue Bipliopoli, & librorum Impressoribus, sub excommunicationis latae sententię, ac quingentorum ducatorum auri de Camera pro vna Camera Apostolica, seu Fisco nostro, & altera medietatibus eidem Ludouico applicandorum, & insuper amissionis librorum, & aliorum, vt supra applicandorum pœnis toties, quoties aliquis contrauerit, ne dictum opus Ludouici Demontiosij modo, quo dictus Ludouicus imprimi facere intendit, absque eiusdem Ludouici, vt prefertur, aut eius heredum, & successorum suorum expressa licentia, seu consensu, vel mandato imprimere, seu imprimi facere, aut vendere, seu venale habere, seu proponere, figuraeque in eo existentes, & pro tempore ab ipso Ludouico in lucem edendas, ære, aut ligno incidere, seu incidi facere quoquo modo audeant, vel presumant. Mandantes vniuersis, & singulis Venerabilibus fratribus nostris, & in statu san-

Et Romana Ecclesia legatis, eorumq; & Sedis Apostolica vicelegatis, necnon Archiepiscopis, Episcopis, eorumq; in spiritualibus vicarijs generalibus, necnon tam dictæ Urbis, quam quarumcunq; aliarum ciuitatum, terrarum, & locorum ipsius nostri status ecclesiastici gubernatoribus, & locorum ordinarijs, ac temporalibus officialibus, vt quoties pro ipsius Ludouici, seu illius heredum & successorum parte fuerint requisiti, vel eorum aliquis fuerit requisitus, eidẽ Ludouico, seu eius heredibus, & successoribus prædictis efficacis defensionis præsidio assistentes, ad omnem ipsius Ludouici, eiusq; heredum, & successorum huiusmodi requisitionem non permittant opus ipsum contra præsentium tenorem ab aliquo imprimi, aut impressum vendi, & venale teneri, figuræ in eo existentes, & in posterum per ipsum Ludouicum in lucem edendas, ære, aut ligno incidi, aut incisas venales exponi, contradictores quoslibet, & rebelles per censuras ecclesiasticas, ac alias eorum arbitrio imponẽdas, & moderandas pœnas, cæteraq; opportuna remedia appellatione postposita compeſcendo, ipsasq; censuras etiam iteratis vicibus aggrauando, & interdictum ecclesiasticum apponendo, alijsq; iuris, & facti remedijs opportunis auctoritate apostolica exequantur, & obseruari curent, & faciant, & contra ea non obseruantes iuxta earundem præsentium tenorem procedant, inuocato ad hoc, si opus fuerit auxilio brachij secularis. Non obstantibus constitutionibus, & ordinationibus apostolicis, cæterisque contrarijs quibuscunque. Et insuper quia difficile foret præsentem literas ad qualibet loca deferri, volumus, & apostolica auctoritate decernimus, quod illarum transumptis, vel exemplis, etiam operi prædicto, seu libro tam per impressorem præfixis, quam præfigendis plena, & eadem prorsus fides vbique tam in iudicio, quam extra adhibeatur, quæ presentibus adhiberetur, si forent exhibitæ, vel ostensæ. Datum Romæ apud sanctum Marcum, sub annulo Piscatoris, die xxii. Iulij, M. D. LXXXV. Pontificatus nostri Anno primo.

Io. Bap. Canobius.

LVDOVICI DEMONTIOSII

GALLVS ROMÆ HOSPE.



VM ROMÆ agens antiquorum operum reliquias, & fragmenta, quæ exspatianti passim obuia fiunt contemplor: in quibusdam artificium laudo, in alijs molem suspicio, ex multis vero priscorum mores animo repeto. Sed dum singulorum usum explo-
ro, hoc me in plerisque male habebat, quod ex ijs quædam magno molimine facta ab antiquis animaduenterem, in quem tandem usum, passim videbam ignorari. Non de obscuris loquor: sed de ijs etiam quæ à scriptoribus celebrata sunt, & quorum formæ typis excusæ ob oculos omnium versantur. Vt sunt obelisci, qui Romę pluribus locis conspiciuntur. *Vnus integer & erectus in Vaticano: alter fractus, & iacens ad portam Capenam, quæ hodie vulgo nuncupatur sancti Sebastiani: & alij in Vrbe plurimi: In quibus stupenda moles ex vno lapide miraculo est. Sed cui tandem vsui excisi fuerint, tantum refert Plinius soli dicatos fuisse, radiorum eius argumentum in effigie esse, & ita significari nomine Aegyptio. De Pyramide quæ est ad Portam Trigeminam, siue Ostiensem, nunc S. Pauli, fertur ea conditum Sestium. Sed cui tandem fini primum extructæ fuerint immanes illæ Pyramides Aegypti, ad quarum exemplar hæc paruo modulo extructa fuit, ne Plinio quidem suboluit: non enim autoribus earum vanitatem exprobrasset, quorum memoriam iustissimo casu oblitteratam fuisse scribit. Atqui non sit mihi verisimile, longo tempore, immenso pretio, tam immanes moles sine causa fuisse extructas. idq; ab Aegyptijs, apud quos tum maxime studia flore-*
A bant,

bāt, quorumque ingenia omni disciplinarū genere exulta-
erant. De arcu Iani (sic vocant molem illam quadratam, quę
est ad arcum argentariorum) nemo non suspicatus est ali-
quid enigmatis sub ea latere, & arcana quędam temporum
contineri. Itaque quod primum occurrebat ei affinxerunt.
quatuor scilicet eius structurę lateribus quatuor anni tem-
pora significari, duodenis vero nidulis qui sunt in singulis la-
teribus, totidem anni menses. Atqui non animaduertunt
annum ea ratione fore mensium xlvij: cum in inte-
gra mole totidem sint niduli. De numismatis etiam, in qui-
bus Ianus geminus conspicitur, ex altera parte rostrum na-
uis, qui frequentes hic omnium manibus teruntur, leuia iti-
dem sunt quę de eorum significatione non vulgus tantum
dictitat, sed & quę literis prodita sunt. Gemina scilicet illa
facie significari tempus præteritum, & futurum: & vtriusq;
habendam esse rationem. Vel si quid eis præterea ascribunt
eiusmodi est, Vt cuius de plebe, etiam non consulto Iano
sit notissimum. De Septizonio, ridicula sunt quę passim cir-
cunferuntur. Itaque de eo doctiores parcius scripserunt, aut
hesitanter. Cum tamen inusitata architecturę species satis
admoneat non vulgarem eius vsum fuisse. Imo quę fuerit
quondam totius operis constitutio, nemo adhuc prodidit.
Hoc tantum fertur, ad septimum vsque ordinem columna-
rum molem quondam surrexisse, aut eum saltem fuisse ani-
mum auctori eousque attollere. Sed quorsum, nemo ausus
est profiteri. At tantum ne otij antiquis illis ab rebus serijs
superfuisse dixerimus, vt nihil nisi cementa cementis, colū-
nas columnis componere. cogitarent, nulli tandem vsui?
Ego sane non crediderim. Imo verò cum nulla ex ijs operi-
bus commoditas, neque publice, neque priuatim percipere-
tur, eo ipso argumentum quoddam reconditum ibi latere su-
spicor, & singulis membris argumenti partem contineri.
Eiusmodi autem argumenta esse oportuit, vt & autorita-
tem haberent, & ipsa in arcanis haberentur. ridiculum enim
fuisset in re humili, & trita solertiam ostentare. Porro duo
sunt

sunt argumenta, quæ dignitate, & mysterijs omnibus alijs antecellunt. Vnum de religione, alterũ de tempore. In vtroque quædam erant quæ parcius vulgabantur: vsus enim tantum populo concedebatur, arcana verò apud Aegyptios penes sacerdotes erant, apud Græcos penes Hierophantas, apud Romanos penes Põtifices: qui omnes arcana partim fabulis, partim imaginibus velabāt. Maxime vero Aegyptij, & Græci quorũ cõmenta quæ ad religionem spectant persequi, infinitũ esset. De tẽpore etiam longum esset omnia recẽlere. Sed nobiliora tantũ excutere, non ita molestũ fuerit: cum magna pars vel exemplis eorũ quæ adhuc Romę conspiciuntur illustrari possit. Sed prius temporum rationes explicandæ sũt, quarum memoriæ magnifica illa symbola posita fuerunt. Cum enim diu, multumq; veteres defudassent in definiendis temporum interuallis, vt ciuilis temporum institutio cũ naturalibus temporum rationibus conueniret, symbola plura excogitarunt ex anclati laboris præclara monimenta, quæ obseruationibus temporum subsidio essent aduersus ipsius temporis iniurias: ne venerandæ eius antiquitatis memoria intercideret. Quãtum enim laboratum est in anni modo definiendo? Fuere primum qui ex mense lunari annum constituerent: quod notabili quodam indicio rerum vices ex orbe Lunę notarentur. Fuere & qui ex tribus mensibus: quod ternis quibuslibet aeris temperies mutaretur. Acarnanes vero sex mensibus annum suum definierunt. Posteriores eum fecerunt duodecim mensium: quod hoc spatio quatuor temporum vicibus peractis omnibus noua facies rediret, & labor idem agricolis. Sed cum dies anni in menses xij. tribuere vellent, itidem & rationem habere duorum luminum, quæ tempus labens cælo ducerent, hoc vero illos exercuit. Si enim vicenum nouenum dierum facerent, annus qui inde conflabatur 348. dierum vtriusq; luminis anno minor euadebat. Si ex diebus 31. singulos menses constituerent, modus anni supra Solis & Lunæ rationes excrefcebat. Itaque medium inter hos duos numerus tricenarius prætulerunt,


qui duodecies repetitus annum constitueret dierum 360. & inter Solis & Lunæ metas consisteret. Sed cum hic annus inter duos libratus facile huc illuc impelleretur, Aegyptij ad Solis rationes eum traxerunt, adiectis quinque diebus anno communi: hac adiectione rati se proxime ad solis metam accessisse. Ita illis annus 365. dierum factus est. Tum quia huic anno diem vñ abesse videbant a solis curriculo, quadriennio confecto diem vnum intercalabant conflatum ex quatuor illis quadrantibus diei. Contra Græci eundem annum ad Lunæ rationes retraxerūt, religione ducti propter Olympiades. Semper enim olympias plenilunio, & decimaquinta mensis quinto quoque anno erat celebranda. Ideo necesse fuit quadriennio confecto anni communis, & lunaris rationes eodem reuolui, vnde initio profectę essent. Sed annus græcus erat 360. dierum, annus Lunaris 354. horarum 8. & paulo plus quam duorum triētum horæ: sic diebus quinque horis fere septem dissidebant periodi. Inuenta est tetraeteris, quę binos dies singulis annis intercalando, anni communis moras pensaret, & dissidium inter vtraque tempora componeret. Quippe cum ex annorum comparatione quadriennio exacto excessus deprehenderetur dierum 22. horarum quatuor circiter, adiectione octo dierum fiebat mensis embolimus 30. dierum, & paulo amplius. Sed hac adiectione annus communis lunarem vicissim excedebat aliquot partibus diei. Huic vitio remedium excogitatum fuit exæresis, vt cum quid discreparet eximeretur dies vnus, aut summum biduum: qui dies exæresimi vocabantur. Sicque defectus diebus adiectitijs supplebatur, excessus cœrcebatur exemptilibus: vt tandem exacto quadriennio menses redirent in gratiam. Ea erat tunc anni Lunaris forma: cum tamen adhuc menses omnes essent dierum 30. Sed erat tamen interea alia tetraeteris solaris, In qua dies vnus quarto quoque anno intercalabatur: ad cuius rationes anni temporum describebantur. nam tetraeteris lunaris ciuilis tantum fuit. Sed displicuit hæc annorum distinctio: ac si eidem numini

duæ


duæ cellæ fuissent constituendæ . Tetraeteris lunaris erat dierum 1447, solaris vero quatuordecim diebus solidis maior: creditum est duabus cōtinuis tetraeteridibus peractis si mensis vnus lunaris intercalaretur, Solis & Lunæ periodos ad sua initia redituras, & nouilunium in primum diem mēsis sequentis, casurum. Itaque ex duabus tetraeteridibus octaeteris conflata fuit. diuque mansit hæc periodus in Græcia. donec Mēton nouis rationibus excogitatis ad eius emendationem animum appulit, adiectis annis xj. octaeteridi, vnde enneadecaeteris compacta est, quæ septē embolimis equaret solis & Lunæ rationes annis 19. confectis. Placuit diu anni Metonici ratio, cum tamen in ea solis *ὑποσχι* lateret: cæca tamen, & quæ perspicaciores fugeret. Non potuit tamen fugere Calippum, qui longo post tempore eam deprehendit, deprehensam castigauit, & anni Metonici pomeriū ampliavit vsque ad quatuor cyclos decemnouenales 76. annorum: quem terminum amborum luminum erroribus præscripsit, vt ijs explicatis ad suas epochas reuerterentur. Et sane parum abfuit. sed differentia illa quantumuis exigua ab Hipparcho tamen animaduersa fuit. Hic eadem ratione Calippi ambitum ampliavit, atque Metonis ambitum Calippus. Metonis septa quadruplo ampliauerat Calippus, hæc rursus Hipparchus quadruplo, tercentos & quadraginta annos periodo sua includens: quæ ratio ad hunc vsque diem cum corporum cælestium motibus consentire iudicatur. Vir magnus, quem nemo vnquā pro meritis satis laudauerit: cuius arbitrio Sol & Luna litibus suis compositis post tot sæcula tandem in gratiam redierint. Vide quantum desudarint veteres temporum viam insistentes, vt duo illa lumina ijsdem sacris colere possent, nunc hoc nunc illo renuente. Vt vero feriæ cum cyclo Metonis consentirent, id post 133. annos accidebat: qui numerus ex septem enneadecaeteridibus constabat, hoc est ex septies nouendenis annis. Ex his solaris anni metonici modus fuisse deprehenditur dierū 365. scrupulorum diurnorum 1576. annus vero Calippi dierum

365. qualis est Iulianus. Hipparcheus vero fuerit dierū 365, horarum 5, scrupul. 55, secund. 12. huc enim ratiocinia redeunt, si singulas periodos in dies explicemus, & numerum dierum per earundem annos diuidamus. Sed nec Romani parum insudarunt definiendis temporum interuallis: unde & variæ fuerūt apud eos annorū formæ, & varia intercalandi genera. donec Iulius Cæsar orbe cōposito, etiā celestiū orbiū diffidia cōponere tētauit. Sed hæc aliūde peti possunt. Sunt enim qui in hac palestra strenue versati sunt, quibus non lim decoquere. De symbolis temporū dicere tantum constitui, vt eorū, si possim, vsum restituā. Meminerimus igitur anni illius veteris dierū 360. qui inter Lunarem & Solarem constitutus, in vtrumque paratus flecti, facile se applicabat quo illum mores, & instituta hominum vocabant. Itaque in Aegypto ex æquabili lunaris factus est, Aegyptiorum votis annuens. Ea scilicet forma semper prima fronte placuit, cū res existimaretur ex captu vulgi, qui lunæ vices facilius ex eius orbe perspicit quā solis metas nullo notabili indicio signatas. Cum igitur annus communis ad lunarem deflectebat, annus ex vtroque compositus lunaris dicebatur. Tandem vero Aegyptiorum in phenomenis perspicacitas ad solis rationes annum retraxit, & annus solaris factus est. Inde orta est fabula, Mercurium cum Luna ludētem alea vicisse, & septuagesimam secundam partem luminis ab ea extorsisse: nempe quinque dies de anno lunari, quibus adiectis anno æquabili 360. dierum annum solare effecit, dierum 365. cui ad solis exquisitam mensuram paulo amplius quadrante deerat: cuius ratio habebatur post confectum quadriennium. Aegyptij vero vt ostenderent eam periodum solis & lunæ rationes continere, serpentem pingebant caudam ore admordentem, vt significarent annum lunarem circulo quotannis ad sua initia redeuntem, & tamen iustæ magnitudinis mensuram ulterius extendi. Totus igitur serpens annus erat solaris, circulus annus lunaris, pars caudæ, quæ intra os latebat differentia qua solaris annus a lunari discrepabat. Sed lōgus
deinde

deinde progressa est Aegyptiorum audacia : cum non satis esse ducerent argutis hieroglyphicis sententias suas mandare, nisi operum magnitudo argumenti magnificentiam emularetur, & molis diuturnitas temporum diuturnitati par esset. Itaque alia stupenda symbola excogitarunt, Pyramides, quarum excelsa cacumina vniuerso orbi, & omni quo miraculo essent. earum maxime quae sitae sunt in parte Africæ, monte faxeo & sterili, non longe a Memphi, ad nauigantibus vndique conspicuae: ante quas erat sphinx, immani & ipsa magnitudine miranda, quae admoneret aliquid ænigmati latere. Sed posteritas nihil in eis præter molem contemplata risit, tanquam ociosam, & stultam pecuniæ regum ostentationem. Et tamen qui penitus inspexerit, deprehendet latere in ijs arcanam multa antiquæ illius sapientiæ Aegyptiorum, de quibus alias dicturi sumus. Nunc enim ea tantum persequor quæ ad anni rationem pertinent. Diximus autem annum solarem ex 365. diebus, & vnius diei quadrante tandem ab Aegyptijs factum fuisse. quocirca quadriennio exacto dies sequens, velut in partes quatuor tributus quadrantem singulis præceditium quatuor annorum adiciebat. Sicque tamen si singuli anni sumpti seorsum imperfecti essent, quaterni omnes integri erant. Hoc igitur cum vellent Aegyptij significare Pyramides illas extruxerunt quatuor laterum, quæ in unum coeuntia eodem puncto terminarentur: quemadmodum, & anni singuli tetraeteridis finiebantur die vno, qui post confectum quadriennium intercalabatur: ut omnium idem esset finis, idem exitus. Aegyptij igitur ea forma duorum luminum consensum significare voluerunt, simul rationes illas non cartis, aut exiguis tabulis mandare, sed æternis monumentis, quæ temporum diuturnitatem equarent. ad quarum exemplar parua illa pyramis extructa fuit, quæ est ad portam Ostiensem, mœnibus vrbs ita determinata, ut pars altera sit intra mœnia altera extrorsum procedat hoc modo.



Idem habuerunt in animo autores obeliscorum, atque ij qui extruxerunt pyramides. peræque etiam vsus eorum posteros latuit, forte & eos qui Romam deuehendos curauerunt, eo ipso mirandos magis, quod propter operis tantum audaciam adeo expeti potuerint: quodq; apud eos qui vsus eorum ignorarent, molis tamen autoritas constaret: qua etiã effectum aiunt, vt cum Cambises vrbe[m] solis expugnaret, ventumq; esset incendio ad crepidines obelisci, extingui ignem iuberet, molis reuerentia, qui vrbis nullam habuerat, vt inquit Plinius. & tamen forma ipsa obelisci, præter molis magnitudinem pulcherrimos vsus continet quaquauersus spectetur. sed nos, vt iam professi sumus, eum tãtũ persequimur, qui ad anni rationẽ spectat, quando eius obseruationis memoriã ad posteros hoc præclaro monimẽto veteres transmittere voluerunt. Itaque quod dictum est de pyramidum lateribus. idem de quatuor lateribus obeliscorum dictum velim: quæ & ipsa in vnum punctum concurrerent, si ad summum perducta essent. Sed cum obeliscorum moles pro ratione magnitudinis absolui non posset, rescisis eorum cacuminibus ex parte integram magnitudinem existimari voluerunt. atque inde intelligi, quemadmodum quaterna latera obeliscorum in vnum concurrerent, si ad summum producta essent, sic in tetraeteride solari singulorum annorum exitus sustineri, vt post confectum quadriennium, vnus & idem dies omnibus finem imponat. tametsi non in eum tantum vsus parata quondam fuerunt immania illa opera. Latent enim sub ijs alia etiam arcana, quæ ex professo alias a nobis explicabuntur. nec enim adeo leuia sunt, vt obiter hic & pertransennam explicanda sint. Nunc satis est ostendisse non omnino vanam, & otiosam fuisse operam Aegyptiorum - quæ antiquæ illius sapientiæ vestigia tam præclaris symbolis consignauit. nulla enim opera male collocata dici potest, quæ rerum cognitioni impenditur. En igitur alterum symbolum, cui rationes temporum Aegyptij seruandas mandarunt.



At prisca tum Romani, tum Græci, cum non tantum eis
otij suppeteret ad tantas moles extruendas, curarunt tamen
& ipsi ut quæ de temporum rationibus magnis vigilijs obser-
uarant, posteris nota essent: & compendio id ipsum assequu-
ti sunt, quod Aegyptij immenso labore perfecerant. Quippe
cum sua de religione dogmata æternum mansura crederet,
tempori numen quoddam affinxerunt, cui temporum ratio-
nes seruandas committerent. Vt si non argumenti dignitate
earum memoria permaneret, at religionis saltem veneratio-
ne illæsa in omne æuum protraheretur. Hac de causa Iani
bifrontis figura annum suum signabant, Ianus ideo bifron-
tem colebant, & geminas portas eius belli pacisque indicio
insignes: nam tempore belli apertæ erant, clauderentur cum
pax erat: vnde & Patulcius, & Clusius Ianus dictus fuit.
Vtrumque vero temporis argumento fiebat. Cum enim an-
no lunari vterentur, tum Romani, tum Græci, intercalabant
post Numam quidem alternis, priore decem dies, altero vn-
decim, ut anni simul sumpti cum sole congruerent, licet sin-
guli discrepant. Tametsi enim Romani & Græci lunari-
bus annis vterentur, semper tamen curarunt, ut rationes tē-
porum cum sole congruerent. Vnde varia fuerunt interca-
landi genera, quæ hic recensere, non est animus. Ergo singu-
li anni erant caui, sed intercalatio hos hiatus explebat. Hoc
cum significare vellent, Iano duas portas patentes faciebant;
quæ duorum annorum lacunas representarent. Ideo etiam
hoc argumento bellum significantes, quod Solis & Lunæ ra-
tiones toto eo tempore dissiderent. Intercalatio vero portis
clausis significabatur, expletis scilicet lacunis. Ideo & pacis
indiciū fuit, quod hoc supplemento Solis & Lunæ dissi-
dia composita viderentur. sicque a tempore ad conditiones
temporis symbolum translatum fuit, ut etiam belli pacisque
vices ex eo colligerentur. Qui deinde sequuti sunt aliud præ-
terea magnificum argumentum eodem symbolo complexi
sunt, antiquitatem generis inde ostentantes. Itaque ad Ianū
politiam & mores referentes, hoc eius antiquitatis argumen-

tum proferebant, quod primus in latio temporum rationes explicasset, quanquam imperfectas, vt ferebant tunc tempora. Itaque eum pingebant addito rostro naui, quod in anno definiendo rationem tantum habuisset Lunæ, quæ apposite rostro naui significabatur, quod solem antecederet. Atque adeo hoc inuento delectati sunt, vt cum primum æs Romæ signari cepit, hæc notā vsurparint: vt ijs publicis monimētis temporum rationes, & antiquitatis memoriam mandarent. Nota æris fuit (inquit Plinius) ex altera parte lanus geminus, ex altera rostrum naui. His Plinij verbis suffragantur vetera numismata, cuiusmodi multa habeo, in quibus lanus gemina fronte exprimitur, prolixa barba, interdum etiam sine barba: cuius arcana obiter exponenda sunt. Macrobius lib. I. Saturnaliorum ostendit, sub Iani nomine deos omnes exprimi. Omnes enim deos ad Solem referri, Solem vero eundem esse, atque lanum. Ex sententia vero physicorum Apollinem, & Dianam intelligi. Inde & Dianam, quasi Ianā dictam fuisse, adposita litera D, vt sæpe decoris causa adiecta est. Cur vero bifrons diceretur, inde ortum putat, quod præterita sciuerit, & præuiderit futura. Vel ex sententia C. Bassi, quasi superum & inferum Ianitor esset, atque ideo cū clauī signari. Sed neutra ratio naturam Iani satis explicat. Rectius qui lanum Eanum nominarunt non quod ea notatione cælum idest mundus significaretur, vt idem Macrobius putat; sed quod anni symbolum esset. Idcirco aræ xij. pro totidem mensibus ei consecrabantur. Et quia veteres tum Romani, tum Græci anno lunari primum utebantur, Iani simulachrum ita figurabatur, vt digitis numerum dierum eius anni exprimeret, nempe 355, vt est apud Plinium: pro quo apud Macrobiū male legitur 365, siue librarij, siue autoris culpa ita scriptum fuit. antequam enim Romani anno solari uterentur, ea figura Iani colebatur. Quod vero singulis biennijs intercalaretur, tuncq; duorum luminum ratio haberetur, vt in vnā formā coirent, lanus bifrons dictus est, & lanus geminus. Idem Apollo didymeus.

Inde

Inde & Hermaphroditus figurabatur : qua forma vnus adhuc extat in ædibus Illustrissimi Cardinalis Medicei . Inde etiam Apollinem , & Dianam eodem nomine exprimi : cum eadem periodo vtriusque rationes includerentur . Itaque & pro Iano Apollo & Diana simul interdum gemina facie exprimebantur : Interdum alterutrius tantum facies adponebantur : vel alterius cuiusdam dei , vt Saturni , Iouis , Mercurij , Martis , Mineruæ , Cereris , Herculis . cum hij omnes ad Ianum referrentur , vt idem Macrobius ex veterum arcanis prodidit . Et nos horum omnium exemplis instructi sumus , multis videlicet antiquis numismatibus Romanorū , in quibus horum deorum effigies ex altera parte conspiciuntur , ex altera rostrum navis : in quibus semper Ianus significatur , siue vna tantum facie conspiciatur , siue gemina . Et si quando Romani ciuis cuiusdam vultum in numismatibus virtutis ergo exprimere volebant , semper tamen Iani nota adponebatur . Cuiusmodi habeo antiqua duo . vnum in cuius parte altera est facies Q. Fabij maximi cum hac inscriptione Q. Fab. Max. ex altera rostrum navis . Alterum est Pompei magni cum gemina facie sub figura Iani , ex cuius vertice radij solares oriuntur cum hac inscriptione Mag. ex altera parte est rostrum navis cum his literis Pius Imp. quod numisma in eius honorem cūsum fuisse existimo , cum adhuc Iuuenis esset , vt ex ore legitur . Idque argumento eius , quod de se iuvene , & sylla ætate prouectiore dixisse fertur , plures orientem Solem colere , quàm occidentem . Hoc enim indicare videntur radij solares qui in ea figura ex eius vertice oriuntur sub gemina illa Iani facie . Denique nota Iani semper vsurpata fuit in re nummaria , vsque ad Augusti tempora . Hic , & qui deinde sequuti sunt Imperatores , & facie , & nomine in numis conspici voluerunt . Sed & denarium argenteum eodem argumento signabant veteres Romani notis bigarum , & quadrigarum . Bigarum , eodem sensu , quo Ianum bifrontem fingeant . Quadrigarū
vero

vero vt annum solarem significarent, qui quadriennio ad sua initia redire credebatur. Nam vt iam diximus etsi annus ciuilis lunaris illis esset, habebant tamen in arcanis alium intercalandi modum, vt tempora in annos solares digererent. Alioqui quæ tandem ex illorum fastis annorum ratio colligi potuisset? At fastos eorum videmus annis solaribus notari, nec discrepare numerum annorum qui ex illis colliguntur a solaribus chronologorum. Hæ igitur quatuor annorum periodi solares nota illa quadrigarum significabantur. Notæ argenti inquit Plinius fuere bigæ, & quadrigæ: & inde bigati, quadrigatiq; dicti. Quod si quis hæc aliorum accipiens contendat mecum his notis triumphos significari, vel eorū pompam qui prætura functi vecti essent per circum, ego vicissim ex eo quæsierim sicubi triumphantes viderit equis quadrupedantibus præsentari? Extant adhuc Romæ duo nobiles triumphi exalpti ex marmore: vnus in capitolio, alter in arcu Titi. Idem triumphi, & alij complures in numismatis æreis conspiciuntur: sed in omnibus equi tolutim incedentes expressi sunt. in omnibus vero argenteis numis bigatis, & quadrigatis quadrupedantes. Eorum vero qui prætura functi vecti essent per circum celebratio temporibus Plinij non ita vetus erat, vt huc referri posset. Non vetus inquit & bigarum celebratio in his qui prætura functi vecti essent per circum. Vnde conieci eam notam semper adpositam fuisse, vt lani symbolum esset. Sunt mihi duo numismata aurea in vno est facies Herculis, ex altera parte Zodiacus, in medio quadriga Solis excusso Phaetonte. Hercules, vt ostendimus, idem est cum Sole, & cum Iano. quadriga vero tetraeteris illa solaris quater ambitu Solis iterato. Tetraeteridis vero defectus deprehensus originē, vt puto, dedit fabulæ Phaetontis, cum crederetur nulli mortalium concessum Solis vias metiri, ex ipsius tetræteridis vitio, operis difficultate perspecta. In altero numismate est facies Dianæ, ex altera parte quadriga: eodem sensu atque in altero illo numismate. Vtroque enim quatuor anni significantur, quod eis ex actis de Solis, & Lunæ

Lunæ rationibus componendis cogitaretur. Fuerint fortasse qui de quatuor anni temporibus quadrigam interpretari malint. Sed cur in anno lunari? Quorsum præterea tam vulgaris & trita obseruatio tam præclaris monimentis illustrata fuisset? Quæ tandem eius symboli argutia fuerit? Iam symbola sunt hæc, quæ non ex anni vertentis forma iudicanda sunt, sed ex longioris cuiusdam periodi interuallo, quod Solis & Lunæ diffidijs finem tandem inponere credebatur: vt de tetraeteride Græcorum diu creditum est: qua adeo delectati sunt Græci, vt eius etiam deprehenso vitio, symbola tamen eius semper coluerint. Id animaduertere est in sequenti symbolo quo nullū argutius, neque nobilius vnquam fuit. Moles est in vrbe quadrata, nota etiam dum Iani nomine, tempori quondam sacrata, & celebrata diu frequentia mercatorum, cuius & vsum, & pristinam formam restituere paramus. Tota structura ita posita est, vt tempore æquinoxijs ex binis portis quæ ex aduerso sitæ sunt, altera orientem solem excipiat, altera excludat occidentem. Has inter binæ aliæ patent, quarum altera ad austrum spectat, altera ad Boream. A singulis portis anni singuli inchoantur, omnes simul tetraeteridem referunt. Inter binas portas sunt niduli xij, octo perfecti, quatuor vero imperfecti. En præclarum anni lunaris symbolū, ex quo etiam mensiū ordo colligi potest. Vt scilicet sex primi, si a parte æquinoxij verni inchoemus, vt erat ritus Græcorū, pleni essent omnes. septimus cauus, octauus plenus, nonus cauus, decimus cauus, vndecimus plenus, duodecimus cauus. Plenorum sunt niduli, qui hemicyclij forma excavati sunt, cauorum vero qui relictī sunt imperfecti. forte quia in illis signa quædam reponebantur, ideo dicebantur pleni, vt caui contraria ratione qui vacui erant. Pleni menses tricenis diebus constabant, vacui vndetricenis. Sed si hæc vera sunt quæ dico, annus lunaris erat 336 dierum, cum tamen veteres vno die breuiorem fecerint: vt Numa ipse qui vt scribit Plin. lib. 34. lib. 7. Iani gemini statuam dicauit, qui belli

pa-

pacisque argumento colebatur, digitis ita figuratis, vt *tercentorum* quinquaginta quinque dierum nota per significationem anni se temporis, & aevi deum significaret. Ergo annus qui hoc symbolo notatur vno die longior fuerit? Imo vero hoc ipso arcanū ipsum se prodit, & his quæ dixi fides astruitur. Hinc enim apparet ex mensibus cauis vnum semper fuisse duobus diebus deminutum. Nec tantum ita fuisse constat; verum etiam quis ille mensis fuerit. cum omnes qui postea annum emendare instituerunt mensem Februarium duodecimum dierum fecerint. vt is qui primus imparis numeri superstitione, impares omnes fecit: videlicet septem vnus & triginta dierum, quatuor vndecimum, vnum vero duodecimum. Id ipsum etiam videmus seruatum fuisse in anno Iuliano: adeo sibi constans, & sui semper similis fuit mensium plenorum, & cauorum distributio: tametsi non semper eodem ordine fuerint dispositi.

Octaeteridis symbola nusquam adhuc mihi videre contigit. & tamen adduci non possum; vt credam nullo publico monumento eam celebratam fuisse, cum eius vsus diu in Graecia manserit. Itaque cum in vno & eodem monumento mensium plenorum, & cauorum, & tetraeteridis vestigia reperiā; venit in mentem, supra eam molem lapideam quæ extat hodie, aliud quiddam extructum fuisse, quod octaeteridem referret. Cum enim complexi essent eodem opere tetraeteridem, & mensium plenorum, & cauorum distinctionem, diuersas videlicet rationes, non fuit alienum eodē loco octaeteridem includere, cum octaeteris nihil aliud esset, quàm tetraeteridis emendatio. Vt ita sentiam adducor præterea ratione symmetriæ, quæ non finit molem hanc ita desinere; quin aliud quiddam ædificatum fuerit vbi nunc est lateritiū opus. Id ipsum etiam ostendunt gradus in latitudine muri, quibus ad summum ascenditur, vbi antiqui operis vestigia non obscure legi possunt. Est in medio veluti cella quædam quadrata, quaqua uersus a muro distans pedibus circiter 6. Totum hoc laxamētum in circuitu fornicibus tegitur ad ambulatio-

bulationem circum quatuor cella latera: fornices vero, quæ parte in longum procurunt ex duabus oppositis cæli partibus diem excipiebant, vt ingeminato lumine lux æqualis in omnes partes diffunderetur. Hac ratione fuerunt omnes fenestræ octo, binæ in singulis lateribus, binis quæ sunt in aduerso latere oppositæ. Lumina enim ita fuisse tributa vestigia etiam dum quedam indicant & constitutio operis ita exigebat. Præter has fenestras si quæ fuissent nullus erat futurus earum vsus. Itaque quæ in medio laterum huius renouati operis cernuntur, nunquam ex prima operis designatione factæ fuerunt. Octo igitur illæ fenestræ, cum toto illo superiori ædificio aliam figuram Iani significabant diuersam ab inferiore: nempe octaeteridem, quæ tetraeteridis loco recepta fuit deprehenso tetraeteridis vitio. Et fuerunt forte duo Iani simulachra, vnum in imo, alterum in summo, quæ admonerent duas periodos vno & eodem opere significari. Itaque cum Petrus victor triginta sex Ianos quadratos in Vrbe fuisse scribat per omnes regiones marmoribus incrustatos, & adornatos insignijs militarijs, & signis; duos tamen Ianos seorsum commemorat sitos ad arcum fabianum, superiore, inferioreque. Sextus Rufus itidem eorundem meminit in eadem regione, & vterque celebrẽ mercatorum locũ fuisse scribit, & ad arcũ fabianum, qui forte is est qui hodie arcus argentariorum dicitur, propter hanc inscriptionem quæ in eo sex lineis distincta legitur.

IMP. CÆSAR L. SEPTIMIO SEVERO PIO PERTINACI AVG. ARABICO ADIABENI . . . PARTH. MAX. FORTISSIMO FELICISSIMO PONTIF. MAX. TRIB. POTEST. XII. IMP. XI. COS. III. PATRI PATRIÆ ET IMP. CÆSAR. M. AVRELIO ANTONINO PIO FELICISSIMOQUE PRINCIPI ET IULIÆ AVG. MATRI AVG. N. ET CASTRORVM ET SENATVS ET PATRIÆ ET IMP. CÆS. M. AVRELII ANTONINI PII FELICIS AVG. PARTHICI MAXIMI BRITANNICI MAX. IMP. ARGENTARII ET NEGOTIANTES BOARI HVIVS. DEVOTI NVMINI EORVM.

C

Huic

Hinc apparet, fuisse hunc Ianum celebrem illum mercatorum locum a duobus Ianis denominatum. nisi enim arcus argentariorum idem fuerit cum fabiano, nusquam eius nec Sextus Rufus, nec Petrus Victor meminerunt; tamen si non inter ignobilia opera censeat debuerit, nec eos potuerit latere, cum vterque scripserit temporibus Valentiniani, arcus vero extructus fuerit imperante Antonino Caracalla. Sed duos Ianos fuisse Horatius etiam innuere videtur his verbis.

Hæc Ianus summus ab imo

Perdocet, hæc recinunt Iuvenes dictata senesq;

Leuo suspensi loculos, tabulamq; lacerto.

Sed dubitari possit, duo ne Iani fuerint in eiusdem regionis partibus, an a duobus Ianis de quibus diximus moles hæc, & locus nomen sumplerint. Quidam hunc Horatii locum exponens tres Ianos fuisse scribit, superiorem, inferioremque, tertium qui in medio erat, celebrem illum fuisse mercatorum locum. Itaque omnium consensu hic ille Ianus fuerit mercatorum frequentia celebratus. Addit idem interpretes, totum illud spatium inter duos extremos Ianos dictum fuisse Ianum. significari autem illis Horatii verbis, toto illo vico nihil aliud prædicari, quam pecuniam rebus omnibus anteponendam. Ego vero nescio vbi tertius ille Ianus fuerit, qui potuerit latere eos qui de regionibus vrbis tam accurate scripserunt. Vterque quidem testatur, templum Iani in eadem regione fuisse, de quo Sext. Rufus his verbis, templum Iani gemini æreum quatuor portarum cum signo Iani, Opus Phidiæ, & Praxitelis ab Augusto dedicatum. quæ verba de hac structura intelligi non possunt. Sed & tamen si duo Iani fuerint, non ideo crediderim, de vico qui inter duos erat Horatium intellexisse; sed potius de hoc Iano. Admoneri scilicet eius aspectu ciues, quærendam esse ante omnia pecuniam. Et sane tamen si non fuisset moles posita in eum usum, poterant tamen negotiantes lucrificupi, qui iuxta frequentes erant, non longe petitis rationibus

tionibus eius Dei autoritate sententiam illam probare, finem eius molis ad suas theses detorquentes. Cum enim nota Iani numus signaretur, Ianus pro numo sumi potuit. Quin & Mercurius, ut refert Macrobius ex veterum sententia, pro Iano sumebatur, cum lucro & mercaturæ præesse diceretur, quorum vtrunque ab usu numorum pendet. Exemplum ex nostra angusta dactylotheca proferre possumus, Mercurium ex furda gemma exscalptum addito rostro naus, ut Mercurius Ianus notaretur. antiquum opus, ut & argumentum indicat. Et item alium ex lapide arabico, dextra oculos gestantem. Vidi etiam sigillum æreum Mercurij, oculos, & tabulam gestantis. Interdum etiam quadratus figurabatur, ut & Iani forma quadrata erat. Præterea Ianus lunonius dictus est, quod calendis omnium mensium præesset, quemadmodum & Iuno. Calendis autem foenori pecunia ponebatur, unde & calendarium foeneratorum dictum est. Adde, centesimæ usuræ periodum centum mensium fuisse, quæ eadem octaeteridis erat. Unde non infacete Horatius dixerit ex sententia foeneratorum, Ianum summum ab imo, hoc est totum hoc monumentum Iani tacite innuere, quærendam esse ante omnia pecuniam, & ab summo ad imum nihil nisi pecuniam, quæstum, & foenus prædicare. Nihil fuit igitur necesse, propter hunc Horatij locum Ianos plures extruere. cum de hoc vno Iano tantum ea omnia apposite dici potuerint. Sed ita uti quondam fuisse coniecimus, visum est hic formam eius ad umbrare.



In illud templum areum Iani gemini, cuius Sext. Rufus in eadem regione meminit, duo diuerſa ſymbola in vnum congeſta fuerunt, Iani gemini, & Iani quadrifrontis, quorum altero vetuſtus Græcorum ſignificabatur, altero vero tetraeteris. At ſub duobus Ianiſ a nobis deſcriptis duo præterea continebantur: nempe menſium plenorum & cauorum deſcriptio, & octaeteridis ſymbolum. Cum enim Græcorum inuentum fuerit Ianum quadratum formare, non abs re coniecerimus anni Græci rationes ſub eo latuiſſe. Hoc argumentum temporis in ſepulchris frequenter uſurparunt veteres, vt hiſ ſymbolis memoriæ defunctorum temporis diuturnitatem conciliarent. Ideo ſepulchro Mauſoli Cariæ reguli, quod ei Artemiſia extruxit, addita eſt in ſūmo quadriga marmorea, de cuius ſignificatione iam diximus. Auguſtorum ſepulchra, quæ in eorum numiſmatibus exprimuntur, quaternio ambitu in altitudinem attolluntur, in ſummo ſemper quadriga eſt: vt in numo æreo Antonini, & item in alio L. Veri. Neque enim hic minus appoſite quadrigam temporis ſymbolum eſſe dixerimus, quàm triumphum cum ſupra arcum triumphalem ſtatuebatur. Adde in Mauſoleo Auguſti obeliſcos fuiſſe. Et fama eſt Iulij Cæſaris cineres conditos fuiſſe pileæneæ quæ eſt in cacumine obeliſci, qui eſt in Vaticano. Pyramides Aegypti fuiſſe creduntur ſepulchra regum. Et Seſtius eadem ratione pyramide condi voluit, quæ adhuc in Vrbe extat. Adeo frequenter temporis ſymbola veteres in ſepulchris uſurparunt. Fuere etiam huiuſmodi ſymbola temporum in circiſ frequentia: maxime verò in circo maximo. huc enim pertinent obeliſci, bigæ, & quadrigæ, vt diximus. Sed & carceres, metæ, oua, totus denique circus temporis argumentum erat, & decurſio ipſa. De metis paulo fuſius dicendum eſt. Duæ in diuerſiſ circi partibus ſitæ erant, quarum baſes erant quadratæ, duobus aduerſis lateribus patentes. Vtriq; baſi terne pyramides inſiſtebant, rotundæ, in cacumen ſenſim contractæ. In ſummo erant oua. Bina latera aperta idem ſignificabant quod geminæ portæ Iani. tres
vero


vero metæ trieteridem. Cum enim post triennium trietericæ Bachi celebrarentur, & triennio rationes solis supra annum communem quindecim diebus excreverent, vt tempora in annos solares digerentur, deerant singulis triennij die 15. binis vero trieteridibus confectis mensis plenus 30. dierum, cuius embolismo tempora post duas trieterides ad rationes solis redibant, intercalato præterea die vno singulis quadriennijs, propter quadrantem diei, qui singulis annis supra dierum ratio cinia excreverat. Ideo ternæ metæ seorsum dispositæ pro metâ vna accipiebantur: a quarum altera ad oppositam decursio trieteridem significabat: ab illa rursus ad priorem reditus alteram trieteridem: totus vero ambitus periodum solarem ex 73. mensibus plenis. De trietericis enim Bachi veteres in ludis circensibus cogitasse, argumento est etiam Cibeles leoni insidens ab vna metâ ad aliam decurrens, ita enim in circo figurabatur pristini ritus veneratione. Sacra enim orgia colebant olim Phryges ad fluuium Gallum quarto quoque anno ineunte, vnde trieterita dicta sunt. Inde tametsi Romani ea sacra quotannis postea agerent, ad trieteridis memoriam in circis ea symbola posuerunt.

Vix e circo egressus sum, qua itur ad amphitheatrum Vespasiani, quum occurrit septizonium. vbi ædificium iandudum inclinatum aspicio, tanquam ruinæ proximum. in quo columnæ aliæ super alias triplici ordine attolluntur: & dicitur fuisse animum auctori ad septimum ordinem attollere, indeq; dictum septizonium. Plurimum apud me semper valuit antiquitatis autoritas: maxime si nobilium quorundam populorum, & felicitis cuiusdam sæculi nota adscripta sit. Non enim facile fit vt credam, magno molimine quicquam a felicissimis ingenijs factum fuisse ob leuem aliquam causam. Itaque tametsi nihil comperti habeam, aliquid semper latere suspicor. & raro me hoc iudicium fallit, & si quando fallat in hanc tamen partem peccare malo, quam negligentius circa ea versari. De septizonio, cum primum illud mihi videre contigit, eo ipso quod passim viderem ignorari cui potissimum vlti
extru.

extructum fuisset, eo diligentius cepi illud scrutari, & nisi me coniectura admodum fallit, alium etiam vsum in eo deprehendi, præter eum de quo fama est, positum pro sepulchro. Latere enim in eo suspicor symbolum temporis aliud a superioribus. Sed cuius tandem temporis? enneadecaeteridis. Tamen si mirum videri possit, cum enneadecaeteridis vestigia nusquam alibi notauerimus, eo tamen velle huius monimenti vsum detorquere, cum nomen aliud sonet, & tota operis cōstitutio quæ nunc est, nihil minus significare videatur. Hoc tamen verum est. Sed totum opus integritati suæ prius restituendum est graphice. Id ita institutum quondam, & vt credo adfectum fuit, vt quaternouendenis columnis totum opus ad institutā magnitudinē assurgeret. tamen si hodie tres tantū trabeationes extent, suprema iniuria temporū collapsa: nullū enim apparet nunc operis fastigiū. Sedet in colūnis quæ supersunt videre est, quasdam in antiquarum locū substitutas fuisse. In singulis autem planis sunt nouendenæ colūnæ: quarū quæ in imo sunt, Metonis enneadecaeteriden ostēdūt, quæ eodē annorū numero terminabatur. Tota vero operis cōstitutio ex quaternis ordinibus constās periodū Calippicā significabat, annorū numerū pari numero columnarum referens. quum ex quaternouendenis annis constaret. Diximus autem septies nouendenis annis opus esse, vt feriæ suis locis restituantur. hoc nuda septizonij appellatione significatum est. ne quis putet autorem vnquam cogitasse de opere supra quartā trabeationē attollēdo. Columnarū enim exilitas pati non potuisset, & Calippicæ periodi ratio potior fuit, quam feriarum. Vide igitur argutias. Columnæ omnes quæ eodem plano insistent periodum Metonis ostendebāt, omnes simul sumptæ Calippicam, nudo interea nomine aliud præterea indicante, nempe annorum numerum, qui necessarius erat, vt feriæ cum ijs conuenirent. Tamen si enim Romani dies mensis per ferias non distinguerent, fuit tamen semper in arcanis hæc feriarum dispositio: propter planetarum vicissitudines, quarum observatio peruetus est.

Et


Et nisi res ita habeat vt dico, mirū videri possit, tot simul obseruationes eodem pertinentes in eodem subiecto fortuito reperiri. Casu aliquid horum accidere possit; omnia verò simul contingere posse non sane crediderim. An vero recte de totius operis structura cōiecerimus, quæ olim eius formæ fuerit. poterit ex sequētibus existimari: vbi duplex est ignographia. priore eorū quæ supersunt tantū, altera est totius operis, vt olim fuisse existimamus. Vnum tantum hodie latus superest, & pars frontis, vbi quatuor columnæ quæ lateri proximæ sunt prominent, aliæ vero vnus intercolumnij spatio interius retractæ sunt. Vnde totum opus ita restituendum esse duxi, vt frontis longitudine in partes decem diuisa pro numero intercolumniorum, retractio quatuor intercolumnis distingueretur, prominentiæ vero ternis: vt pars retracta ad prominentem esset in ratione sesquitertia. Patebat autem hac ratione totum ædificiū a fronte ped. 73 per latera singula ped. 27 totius autē operis ambitus ped. 78. Ceterū fama est fuisse sepulchrum Seueri. vulgus Virgilij fuisse dicitur, vt fere omnia quæ vulgi captum excedunt ei adscribi solent. Ego sepulchri monumentum fuisse existimo: cum hæc symbola temporum, vt dixi, sepulchris ad posite conuenirēt, fausto omine æternæ memoriæ. Seueri autem fuisse non auserere, cum autores qui de regionibus vrbis scripserūt non vnus tantum Septizonij meminerint. Itaque operis tantum ignographiam exhibemus, vt nunc est, vtque olim ex his quæ supersunt vestigijs fuisse coniecimus. Et hætenus de temporum symbolis scripsisse sat erit.



- A Peristylum.
 B Murus solidus.
 C Locus ubi cineres reponerentur.

Reliqua ex coniectura supplenda esse duxi. cum non patitur architecturae ratio, molem eiusmodi adeo in altum surgere sine aliquo fulcimento. quo hodie nudatus murus ea parte ruinam minatur. Præterea adiungendæ fuerunt scalæ, quibus superiora scanderentur. Et minimum habitatio quædam temporaria, ubi reliquæ funerum componi possent dum conderentur.

- D Igitur ea statio est.
 E Scalæ.



ILLVSTRISSIMO
ET REVERENDISS. PRINCIPI
ALOYSIO ESTENSI S. R. E.
CARDINALI AMPLISSIMO.



VVM Romæ paucorum mensium hospes ex
priscorum operum vestigijs architecturæ
præcepta animo repeterem, vidi in multis
ædificijs non bene constare rationes sym-
metriæ cum præceptis antiquorum. siue à
principio ignorantia peccatum fuerit, siue exinde fue-
rint mutata, quæ exquilita arte primum facta fuerant.
Et tamen vitia interdum laudari falsa antiquitatis spe-
cie. nec laudari tantum; sed & inde exempla peti. Vt
existimare licet vel ex Pantheo Agrippæ, inter cele-
briora orbis opera quondam celebrato; vt vero nunc
est, ne inter probabilia quidem censendo. quum pars
altitudinis, quæ fuit quondam ab summo, vsque ad pa-
uimentum, intercepta fuerit, contra symmetriæ le-
ges. Et tamen quotusquisq; est, qui interiorē eius tem-
pli partem, vt nunc est, non agnoscat antiquam, et qui
eius conmensum non probet. E diuerso quum eiusdem
templi tholus summa quōdam arte perfectus, illæsus ad
hec vsque tempora manserit, nemo eius conmensum se-
quitur. Nempe hodie pulchritudinem quisque suo sensu
metitur, dum sibi nimium placent omnes, & antiqua fa-
stidiunt. Atqui in architectura veteres vnā tantum
† pul-

pulchritudinis speciem agnouerunt, cuius numeros Her-
mogenes impleuisse dicitur, ducta ratione à commensu
corporis humani, à qua si quis digrediatu errat, vt pas-
sim hodie errari video. Quo circa visum est hanc archite-
cturæ partem ad sua principia reuocare: atque adeo in
Pantheo, omnium quæ extant hodie antiquarum ædium
sacrarum nobilissima, tentare ecquid labor noster suc-
cederet. Quod si qui forte quiritent, indignum Gallum
hospitem operum Romanorum rationes excutere, ad
tuum patrociniu, quo iamdudum se iactat Gallia alum-
nus eius confugit: & hoc qualecunque est tibi dicat. Vt
quum Christiani ritus non sinant mortalibus templa de-
dicari, saltem de sacris ædibus disputatio virtuti illi he-
roicæ, quam in te omnes suspiciunt, mirantur, colunt,
cultus erga te mei perpetuo testimonio dedicetur.

Amplitudini vestra

Deditissimus ser.

Lud. Demontiosus.






LVDOVICI DEMONTIOSII

GALLVS ROMÆ HOSPES.

DE PANTHEO, ET SYMMETRIA

ÆDIIVM SACRARVM.



INTER celeberrima opera, quæ vnquam in toto orbe terrarum fuerunt, Plinius annumerat Pantheum Agrippæ. Si quidem cum orbis miracula retulit, ea omnia longe victa esse contendit ab ijs quæ visa sunt Romæ. In quibus præcipua hæc enumerat. circum maximum a Cæsare dictatore extructum, basilicam Pauli, forum diui Augusti, templum pacis, & Pantheum Ioui victori ab Agrippa factum. Illa temporum iniuria, & furore barbarorum corruerunt, postremum hoc durat adhuc; sed multum tamen mutatum ab illo quod quondam fuit. Mitto parietum ornamenta; sed & forma ipsa mutata est. Quippe cum excelsum è plano surgeret, hodie tredecim gradibus descenditur in porticum, multis ornamentis sub terra defossis, & cum ijs hoc Plinij loco, qui obrutusest eodem pene euentu. Quocirca eiusdē conatus fuerit vtrique succurrere: vt & templum ipsum a fundamentis conspiciendum exhibeamus, & locum Plinij ex densa illa caligine qua iandudū premitnr proferamus in lucem. Primum igitur videndum est quæ essent illæ caryatides ab autore nostro celebratæ, & vbi sitæ essent. Tum si qua earum supersint hodie vestigia. Existimarunt recentiores artifices, caryatides ab antiquis pro columnis tantum oneri ferendo factas fuisse, & omnes eodem modo positas. Ideo cum Pantheum omne diligenter oculis perlustrassent his Plinij verbis admoniti, nec tamen vlla vestigia earum odorari possent, sed ne locum quidem reperire

A cui

cui olim insistere potuissēt, rē vltra nō promoverūt. At viris doctis suboluerat caryatidū non vnū tantū gentis fuisse. sed defuere illis exēpla. Accidit, forte cū aliquando, ante ædē illā iter facere vnā cū Iulio Iacobonio, viro antiquitatis studiosissimo, vt loci aspectu admonitus sciscitaret ex eo vidisset ne vnā quā ibi mulierum effigies marmoreas velut oneri ferūdo positas, aut fragmenta quædam eiusmodi. Tum ille ostēdit mihi quatuor capita mulierum. in fronte porticus ad dextram humeris tenus supra terram extantia, ex totidem tabulis marmoreis exalta, sed asserebat se vidisse mulierum formas integras, egesta quondam inde terra, qua nunc obrutæ latent. Visus sū ilico videre caryatides illas diu a me quæsitas. Quippe cum supra caput earum marmor ex eadem tabula promineat, earum capitibus tota illa proiectura inniti videtur, illæ vero destinatæ oneri terendo. Præterea varius est earum ornatus, & peregrinus. vt vel id admonere videatur cuius sint conditionis. Notum est ex Vitruuio vnde primum caryatidū vsus in ædificia trāierit. Caria inquit ciuitas Peloponnesi cū Persis hostibus contra Græciam consensit. postea Græci per victoriam gloriose bello liberati, communi consilio Caryatibus bellū indixerūt. Itaque oppido capto, viris interfectis, ciuitate deleta, matronas eorum in seruitutē abduxerunt: nec sunt passi stolas, neque ornatus matronales deponere: vt nō vno triūpho ducerentur, sed æterno seruitutis exēplo graui contumelia pressæ pœnas pendere viderentur pro ciuitate. Ideo qui tunc architecti fuerunt ædificijs publicis designarunt earum imagines oneri ferundo collocatas, vt etiam posteris nota pœna peccati caryatiū memoria traderetur. Hoc Vitruuij indicio quis non agnoscat hæc signa? Sed hoc puto fucū fecisse viris alioqui perspicacissimis, quod ait Vitruuius, olim pro colūnis in opere statui solitas. Atqui has nemo vnquā pro colūnis agnouerit. Sed autor primū caryatidū vsū ostendit, quē postea architecti nō dissimili argumēto aliorum etiā traduxerunt, sicubi oneri ferundo inservire posse videtur. Denique Plinij verba ostendunt has in colūnis templi fuisse,

fuisse, non pro columnis adpositas : En igitur quæsitæ caryatides, infausto, si sic loqui fas est, sydere natas caryatides : primum oneri ferendo victorum insolentia destinatas, nunc temporum iniuria mutilatas, humi etiam defossas ; tametsi mores antiqui a tropheis iuberent abstinere. Locis igitur suis reponendæ sunt, quando hunc honorem victis etiam tribui nulla est inuidia. Sed eiusdem operæ est templum ipsum a fundamentis restituere. Nam vt nunc est non Agrippa agnoscat, si sit rediuiuus. Sed priusquam operi manum admouemus, de symmetria disputandum est : quia hac parte templum maxime laborat. Consulatur hac de re Vitruuius, vnde Architecti, tanquam a tripode responsa petunt. Is cap. 1. lib. 3. Aedium inquit compositio constat ex symmetria, cuius rationem diligentissime architecti tenere debent. Ea autem pariter ex proportionem, quæ grecis *ἀναλογία* dicitur. Proportio est ratæ partis membrorum in omni opere, totiusq; cōmodulatio, ex qua ratio efficitur symmetriarum. Nanque non potest ades vlla sine symmetria, atque proportionem rationem habere cōpositionis, nisi vt ad hominis bene figurati, membrorum habuerit exactam rationem. Hæc ille. deinde partiū hominis symmetriam persequens subiungit. similiter verò sacrarum ædium membra ad vniuersam totius magnitudinis summam ex partibus singulis cōuenientissimum debent habere commensuum respōsum. Item corporis centrum medium naturaliter est vmbilicus. Nanque si homo collocatus fuerit supinus, manibus & pedibus pāsis, circiniq; collocatum centrum in vmbilico eius, circum agendo retundationem, vtrarumq; manuum & pedum digiti linea tangentur. Non minus quemadmodum schema rotundationis in corpore efficitur, item quadrata designatio in eo inuenitur. Nam si a pedibus imis ad summum caput mensura erit, eaque mensura relata fuerit ad manus pāsas, inuenietur eadem latitudo vt altitudo, quemadmodum areæ, quæ ad normam sunt quadratæ. En vt aperte dicit ex symmetria potissimum constare; imo sine ea nullam

esse sacrarum ædium compositionem. Hanc autem ad hominis bene figurati rationes exigendam esse: cum in eo vtraque designatio reperiatur, rotunda videlicet, & quadrata. Sed non semper eundem commensum sequutos fuisse architectos, ostendit circa initium libri quarti: qui locus ad symmetriæ explicationem huicnectendus est. Ibi de ciuitatibus, quas colonie Atheniensium de communi totius Græciæ consensu in Asiam missæ occupauerant, sic ait. Hæ ciuitates cum Caras, & Lelegas eiecissent, eam terræ regionem a duce suo Ione appellauerunt Ioniam. Ibi que templa deorum immortalium constituentes, cœperunt phana ædificare: & primum Apollini Panionio ædem vti viderant in Achaia constituerunt, & eam doricam appellauerunt: quod in Doricon ciuitatibus primū factā eo genere vidissent. In ea æde cum voluissent colūnas collocare, non habētes symmetrias earū, & quærentes quibus rationibus efficere possent vti & ad onus ferendum essent idoneæ, & in aspectu probatam haberent venustatem, dimensi sunt virilis pedis vestigium. & cum inuenissent pedem sextam partem esse altitudinis in homine, ita in columnam transtulerunt: & qua crassitudine fecerunt basim scapī, tantum eam sexies cum capitulo in altitudinem extulerunt. Ita dorica columna virilis corporis proportionem, & firmitatem, & venustatem in ædificijs præstare cœpit. Verba ipsa Vitruuij, refero: quia ex ijs, & ijs quæ sequuntur symmetriæ rationes hauriendæ sunt. Pergens igitur. Item postea inquit, Dianæ constituere ædem quærentes, noui generis speciē ijsdem vestigijs ad muliebrem transtulerunt gracilitatem: & fecerunt primum columnę crassitudinem altitudinis octaua parte. Vt haberent speciem excelsiorem, basi spiram supposuerunt pro calceo, capitulo volutas, vti capillamento concrispantes circinnos prependentes, dextra, ac sinistra collocauerunt: & cymatijs, & encarpis pro crinibus dispositis frontes ornauerunt: truncoq; toto strias, vti stolarum rugas matronali more demiserunt. Ita duobus discriminibus columnarum, inuentionem unam virili sine ornamento nudam specie, alteram

teram muliebri subtilitate, & ornatu, symmetriaq; sunt imitati. Posterius vero elegantia, subtilitateq; iudiciorum progressi, & gracilioribus modulis delectati, septem crassitudinis diametros in altitudinem columnæ doricæ, ionicæ octo semis constituerunt. Hactenus sunt verba Vitruuij. Ceterum corinthijs eadem ratio quæ ionicis, præter capitula. Nam Corinthij capituli eadem est altitudo, quæ colligitur ima columnæ crassitudine: ionicæ vero altitudo tertia pars est crassitudinis. Ideo Corinthiæ columnæ graciliores videntur, a virginibus ducta symmetria, quæ inquit idem autor, propter ætatis teneritatem gracilioribus membris figuratæ, effectus recipiunt in ornatu venustiores. Doricum igitur genus virilis corporis proportionem, & firmitatem habet. ionicum verò & corinthium muliebris. Nam in homine forma quadrata probatur, in muliere laudatur gracilis. Maxime verò in virginibus. Vnde illud Terentij, si quæ habitior paulo sit, pugilem vocant, subducunt cibum, reddunt curatura iunceas. Denique mulieres omnes longiores videri volunt, ad id etiam crepidarum adminiculo vultur. ut de forma virili tantum ea intelligenda sint, æque latam esse pansis manibus, quantum a vertice ad imum; non item de forma muliebri. His concessis iam ad Pantheum Agrippæ accedamus, ut eius rationes scrutemur. Occurrit primum duplex porticus, utraque operis corinthij. Hostium templi, eius antepagmenta, supercilium, lumen, totum denique hostium eiusdem generis est. In ipso templo omnes columnæ sunt corinthiæ; & tamen summa operis aliud præ se fert, cum sit forma quadrata, ut primo aspectu iudicaui, cum primum hoc templum mihi videre contigit, & deinde adhibita mensura ita esse deprehendi. cum latitudinem comperissem esse equalem altitudini. En hermaphroditum architecturæ genus. summa operis virilis est, partes eius muliebres. Nam forma quadrata, ut dixi, virilis est, rationes autem corinthiæ muliebres. Nulla est hic igitur symmetria. hæc enim nihil aliud est, quam partium inuicem, & earundem ad vniuersum commensus. Ergo terrebecinum opus, quodque a Plinio inter nobilissima orbis censetur

censetur improbabilis? absit. Imo vero ad exquisitam architecturæ normam constructum fuisse existimo. Sed congestitium nunc esse, eiusque tantum sub terra latere, quantum illi ad iustam symmetriam deest. Itaque restitui non potest, nisi egestis ruderibus. non ijs tantum quæ sunt extra templum, sed & ijs quæ plurima sunt intus. Nec mirum, cum in alijs plerisque locis vrbis simili rudum cogerie innumera antiquitatis monumenta obruta sint. maxime in locis humilioribus: tantæ fuerunt antiquæ vrbis ruinæ. In Pantheo verò quantum hac congerie detractum fuerit mensuræ altitudinis, ex symmetria iudicari potest. Hæc ita colligetur. Diameter latitudinis est palmorum 178. de palmo dodrantali intelligo, quo vtuntur Itali, qui veteribus dodrans dicebatur. palmus enim erat tantum trium vnciarum. Hæc igitur latitudo in partes septem & dimidiam vnus septimæ tribuatur, vel in quindecim dimidias partes: eodem enim redeunt rationes, si pro quolibet integro duas dimidias partes sumamus. Ex his quindecimis partibus vna sit nobis modulus, ad cuius commodulationem totius operis rationes exigantur. Cum igitur Dorica symmetria, quæ quadrata est, cum partibus huius operis non consentiat, eius loco vsurpanda est muliebris, vt partium proportionem postulant. Differentia inter has species est trium modulorum, hoc est vnus integri cum dimidio. totam autem latitudinis mensuram esse diximus 178 palmorum, vel 356 modulorum (semissem enim pro modulo sumpsimus) quæ latitudo in 14 partes diuidenda est, prodeunt in singulas moduli 51. Si igitur ter quinquaginta & vnum modulum supra rationes doricas addamus, & ad huius differentię altitudinem terra effodiatur, surget opus corinthium. quod cum primum ita fuisset exstructum falsis postea ratiocinationibus ad doricas rationes tractum est. Sed condonetur hoc moribus, & ignorantie sæculi. Miror magis recentiores, si non templi formam ipsam, at saltem errorem non animaduertisse. Imo verò probauisse, & pro canone habuisse, vnde præcepta artis peterent. Hoc tamen veterum solertiam

lertiam non fugerat, refert enim Vitruuius cap. 3. lib 4. quosdam antiquos architectos negasse dorico genere aedes sacras fieri oportere: quod mendosæ, & inconuenientes symmetriæ in his cõficerentur. Itaque negasse Tarchesium, item Pitheum, nec minus Hermogenem, qui cum paratâ habuisset marmoris copiam in dorica ædis perfectionem, commutauit, & ex eadem copia eam doricam Libero patri fecit. Cur autem hæc species displicuerit, putat autor noster in causa fuisse incommodam triglyphorum, & lacunariorum in operibus distributionem, qua commutata vt a suis præceptoribus acceperat, ab Hermogene alijsq; dissentit. Sed eius pace dixerim, totius operis commodulatio vitiosa est. Quocirca veteres illi architecti negabant omnino dorico genere aedes sacras fieri oportere. Imo & Vitruuius ipse fateatur, si rediuius hoc architecturæ genus contempletur. Non enim de triglyphis, aut metopis hic quæstio est, sed de symmetria, & de summa operis, quæ infelix omnino est, & eadem semper futura, dum manebit hæc forma. Itaque non abs re sententiam mutauit Hermogenes, Ionicam ædem libero patri faciens, quam antea dorico genere facere instituerat. Hermogenes inquam quem acuta, magnaq; solertia effectus operum fecisse testatur Idem Vitruuius, reliquisq; fontes, vnde posteri possent haurire artis rationes. Nunc vitio deprehenso operepretium est illud emendare, vt opus integrum a fundamentis restitueretur: interpellant enim caryatides nostræ, itidem & ipsæ ruderibus obrutæ, miscellæ caryatides. Hercules sane labor, hoc templum velle repurgare. Sed vt mathematici solent, rem ipsam demonstramus procul ab omni materia, & dicto citius opus ipsum pristinae formæ restituetur. Primum cum intus maxima templi latitudo sit 356. modulorum cum dimidio fere, qui numerus diuisus per 14 dat quotienti 25. hic vero numerus ter multiplicatus 76, si hunc numerum addamus mensuræ latitudinis, vt corinthiæ rationes postulant, erit tota altitudo tēpli, ab imo ad summum modulorum 423. ab imo vero

pau-

pauimento quod quondam fuit, ad hoc lithostratum tota altitudo erit modulorum 76. quanta scilicet differentia est inter doricam symmetriam, & corinthiam. Hoc quanquam ex symmetriæ canonibus satis constet, notabo tamen huius ratiocinationis alia vestigia, vnde hoc mihi primum suboluit. Est enim mihi gratissima huius exantlati laboris recordatio. Primum cum diligētius oculis omnia lustrarem, displicebat ratio altitudinis, ad latitudinem. Deinde cum Plinij descriptionem animo repeterem, querebam vbinam olim collocatę fuissent caryatides. Nam tametsi nulla earū vestigia apparerent, non ideo erat animus Plinium arguere mendacij. Præterea cum templum esset omnium deorum, reperire non poteram, vbi antiquo ritu simulachra apposite collocarentur. Sed nec tribunal descriptis a Vitruuio rationibus conuenire videbam. Ad hæc cum columnarum partes singulas oculis metirer, vidi in singulis plintum tenuiorem esse, quàm columnarum commensus exigeret. Videbam præterea a porticu in templum vno gradu descendi; cum causa nulla subesset cur non a principio æquata fuissent omnia. Tandem etiā rursus, ad plinti symmetriam conuersus explorare volui, num plintus olim crassior fuisset. Et certe ita comperi; sed occultari partem crassitudinis ab hoc lithostrato. Præterea eundem lapidem cui plintus insistit, nō ad libellam cum plintide terminari, sed longius sub lithostratum extendi, vt solent stylobatarum proiecturę. Hęc insitens vestigia, tandem odoratus sum locum diu a me quæsitum: vbi vera templi species tot annis latuerat. quam simul aspexi agnoui, nec satis esse duxi, nisi & caryatidum mensura ad vnguem conueniret. Itaque ad eas recurro; exploro quanta sit latitudo marmoris ex quo exalptæ sunt. comperio eandem eius latitudinem, atque plintidum columnarum templi, eandem etiam marmoris speciem. Enimuero tum demum mihi gratulari cœpi, cum omnia viderem coniecturis nostris suffragari, nec quicquam discrepare. Itaque his compertis videre visus sum templum ipsum egesta terra, a fundamentis pristinæ formæ resti-

restitutum, & eius speciem totius orientis miraculis à Plinio quondam prælatam, nunc primum denuo e tenebris emergere situ, & squalore depositis. Totam autem altitudinem, quæ intercepta fuerat ita commode distribui posse visum est, si stylobatis columnarum templi cum coronice, & basi dentur palmi tredecim: ut inter coronicem & basim relinquantur pro singulorum stylobatarum altitudine palmi deni, & pro latitudine feni. Hic olim collatæ fuerunt caryatides, ad templi speciem ornandam, inde in peritorum manibus reuulsæ fuerunt. nunc igitur pristinum locum repetite caryatides. Nec vero mihi quisquam hoc negauerit, cum marmoris ex quo exsculptæ estis, & plinti columnarum latitudo sit eadem, & eadem vtriusque marmoris species. Stylobatæ autem eadem quoque latitudo fuerit, atque plinti. Ite igitur in pristinas sedes caryatides. Stylobatas autem in eiusmodi operibus adponi debere docet Vitruuius cap. 3. lib. 3. Structura inquit per totum solum quam solidissima fiat: supraque terram parietes extruantur sub columnis dimidio crassiores quam columnæ sint futuræ: ut firmiora sint inferiora superioribus, quæ stereobatæ appellantur: nam recipiunt onera. spirarumque proiectionæ non procedant extra solidum. Item supra parietes ad eundem modum crassitudo seruanda est. Et paulo post, Extructis autem fundamentis ad librametum stylobatæ sunt collocandi, supra stylobatas columnæ disponendæ. Id ipsum etiam ostenditur cap. 7. lib. 4. Vide igitur stylobatarum usum, & an hæc noua species quam templo inducimus cum veterum rationibus cõsentiat. Coronices autem & bases stylobatarum perpetuæ templi rotundationem cingebant, sub stylobatis prominentes, in intercolumnis retractæ. quæ prominentiæ & retractiones Vitruuio scamilli dicuntur. ut obiter hoc etiam doceam quod interpretes non explicarunt. Nam quod Vitruuius præcipit stylobatas semper disponendos esse per scamillos impares, hoc vult, ut proiectionæ & retractiones simul sumptæ sint impares. Nã si sæcus fiat, in eadem syzigia columnarum è duobus extremis scamillis


millis alter erit semper vacuus. Præterea alter extra parietem proijcietur alter, vero semper recedet introrsus: cum duorum extremorum eiusdem ordinis eadem semper debeat esse ratio. Hoc apertius notari non potuit, quam per scamillorum imparitatem. nam columnarum & intercolumniorum nihil refert par, vel impar sit numerus, dum impares sint scamilli. Iam a plintis columnarum, vsque ad bases stylobatum ornamenta templi descripsimus. Ad hanc vsque templi Zonam gradibus descendebatur. nempe ab hostij limine vsque ad parietes stylobatum, quibus affixæ erant caryatides: dispositis in ea parietis crassitudine gradibus decem, vndecim vero cum ipso limine: Nam Vitruuius gradum mensuram ita finiendam censet, vt retractiones singulorū ne minores sint sesquipede, neque duobus pedibus maiores. altitudinem vero nec minorem dodrante, nec maiorem dextante. Si igitur sesquipedali latitudine hos gradus finiamus, omnium latitudo erit quadraginta modulorum, siue 20. palmorum dodrantalium. Et recte, tāta est enim latitudo parietis, dempto limine vsque ad stylobatum prominentiam. Descensus verò, si dextantarios singulos gradus fecerimus, erit tota altitudo 12 palmorum & duarum vnciarum, quantam esse diximus stylobatæ altitudinem, cum coronice, & basi. Postquam vndecim gradibus descensum erat, a fronte vltimi gradus, quanta erat proiectura basis stylobatarum, spatium trium fere graduum sternebatur, quod esset instar alterius liminis, & gradus superiores ab inferioribus distingeret, essetque tanquam modulus crassitudinis profundamento columnarum. Super sunt adhuc de tota altitudine quæ fuerat intercepta palmi 25, quos in gradus 22. tribuemus, dextantariæ altitudinis, ambitum templi præcingentes, eius centro ductis parallelis sesquipedalibus interuallis, vt ab extremo ad intimum pateat spatium 44. palmorum. Totam autem latitudinem templi diximus esse palmorum 178. Itaque si templi diameter diuidatur in quatuor partes æquales, ab extremis gradibus ad intimos centrum versus vtrinque quarta pars totus diametri gradibus

bus tribuetur, duæ vero quartæ hinc inde in medio templi vacuæ remanebunt. Nunc in intimo gradu constitutus suspice tholum, videbis intimam quadragulorum tholi circinationem intimæ graduum circinationi ad perpendicularum respondere. Vt inde facile conijcias, architectum in animo habuisse inferiorem partem templi quodammodo in hæmispherij superioris figuram formare, vt inferiora superioribus responderent. Alioqui tholi pyramides protrahens erat artifex, vt in alijs tectis rotundis. in quibus ab ima tecti incuruatione pyramides omnes coeunt in florem, qui tecti tanquam umbilicus est. Nam quæ Philander de tholo, de flore, & de pyramide comminiscitur, næ ille aberrat toto cælo, nec satis videtur intellexisse, quid esset tholus, quid pyramis, quid flos. quæ vt dicam inuitus sane adducor, cum alias sæpe de hoc autore bene meritum sciam. Hoc etiam adnotare libet, ita rationes huius templi constitutas fuisse, vt extrinsecus in parte tecti conuexa eandem graduum symmetriam seruarit artifex; vt non tantum inferiora superioribus; verum etiam exteriora interioribus responderent. Sed cum hoc templum pantheum fuerit appellatum, vbi nam, & quo ordine deorum simulacra in eo collocabantur? Non enim dijs omnibus eodem loco sacra fiebant. Sextus Pompeius autor est antiquos dijs superis in ædificijs a terra exaltatis sacra fecisse, dijs terrestribus in terra, dijs infernalibus in effossa terra. Primum Ioui tribunal extruendum fuit, cui primum hoc templum dedicatum erat. Hoc è regione aditus templi conspicitur, vbi nunc destructis Idolis est altare maius. Scribit Vitruuius ædes sacras quæ sine cella fiebant tribunal habuisse. Tribunalis autem mentionem facit in duobus locis multum diffitis. In vno ascensum fieri præcipit ex diametri tertia parte, cap. 7. lib. 4. In altero qui est in cap. 1. lib. 5. eius formationem describit his verbis. Item tribunale est in eadem æde hemicyclij schematis, minore curuatura formatum. Eius autem hemicyclij in fronte est interuallum pedum 46. Intror-

sus curuatura pedum 15. Nam tametsi hic de tribunali basilicarum, ibi vero de tribunali ædium sacrarum loquitur, eandē tamen vtriusque rationē esse inde apparet, quod in vtroque triplā ratione sequutus sit. Sed quadraginta quinque legendum est in hoc posteriore loco, non 46. vt habet meum exemplar. Quorsum enim quadragesima quinta parte tantū a tripla ratione differret? Nunc igitur hęc omnia in vnum colligantur. Tribunalis curuatura erit tertię partis totius latitudinis, ascensus item tertię partis. vt in hoc tribunali panthei nostri interuallum frontis patet palmis dodrantalibus 36. horū tertia pars, palmi 12. qui in decem gradus tribuendi sunt dodrantalis altitudinis. retractio verō singulorum erit vnciarum 11. hęc enim mensura pro magnitudine tribunalis satis ampla est. Imus gradus ab limo stylobatum incipiet. altitudo vero omnium eadem fuerit, atque stylobatum. sic enim respondebunt ijs qui ex aduerso in ingressu templi dispositi erant.

Deorum vero simulacra ita erant disposita. In tribunali Iupiter excelsa sede locatus erat. alij verō dij cęlestes, vt gentilium more loquar, in ædiculis illis quę eminet in solida parte muri circa templi ambitum. Dij vero terrestres in intercolumnijs siti erant. Nam ideo videntur ædiculę illę fuisse excauatę in solida parte muri, vt cum in frōte deorum simulacra collocata essent, ponerentur tanquam suum tribunal haberent. Infernales vero in effossa terra, intra eam fornicationem, quę erat sub gradibus potuerunt collocari. Sic enim deorum simulacra suis locis conuenienter disposita fuerint. Sed præstat omnia, quantum chartę angustia patitur, oculis subijcere. In priore pagina vnam ex quatuor caryatidibus, quę terra semiobrutę ante aditum porticus ad dextram conspiciuntur: vnde figura integra existimari possit. In altera pagina, interiorē partē templi, vt olim fuisse conijcimus, ab imo ad summum delineandam curavi.





Nunc lectorem in ipso templi ingressu optarim, vt animo duorum hemispheriorum symmetriam animo cōtempletur, & secum reputet alia templi ornamenta, quæ vel ex tholi vestigijs quadantenus existimare poterit harum rerum bonus arbiter. Nolo his quæ certissimis argumentis ex ipsis fontibus artis hausimus miscere coniectanea, quæ plurima nobis inter scribendum occurrerunt. tametsi non iniucunda forte futura sint lectori. sed templi formam adumbrare tantum cogitamus. Interea tamen nolumus exteriorē templi partem inornatam relinquere, vt integrum opus si fieri possit pristinae formæ restituamus. si id præstare non possumus, ruderæ saltem egeremus, alij quibus plus otij suppetet laborem promoueant. Duplex est porticus ante aditum templi ambæ additię; non enim ex prima operis designatione ita ab autore fuerunt posita. Hoc ita esse commissura ipsa indicat. Aliud indicium est, quod coronices non bene terminentur quā parte templum contingunt, cum debuerint perpetuæ duci per templi ambitum. Sed ne ambæ quidem porticus eiusdem operę fuerunt, vt vel mediocriter in architectura versati norunt. Eius quæ templo proxima est latera tecta erant crustis marmoreis, varijs ex eis exsculptis ornamentis, egregijs sane, sed parum eminentibus. Nec minus elegans fuit interior pars porticus. Sed mitto ornamenta, de symmetria enim tantum dicere instituti: ad quam cum vtrāque porticum conarer exigere, comperi latitudinis ad altitudinem eandem esse rationem, atque latitudinis templi ad eiusdem altitudinem. Porticus altitudinem fumo ab solo cui insunt columnæ ad cacumen tympani cum summo acroterio, arulam illam intelligo quæ est in cacumine tympani, quæ tametsi non habeat iustam acroterij altitudinem, cum ijs tamen quę supra eam erant posita, acroterij altitudinem æquabant. Templi autem ab eodē solo, vsq; ad fastigium tecti altitudo est pedum 139. latitudo vero cum parietum crassitudine pedum 179. est enim muri crassitudo pedum 18, quę dulpicāda est. Porticus cōmensum deprehēdi ex vnius colūne modulo

crassi-

crassitudinis pedum 4. in subdupla ratione ad intercolumnium: cum viderem octo colūnas generis corinthij in fronte porticus dispositas equalibus intercolumnijs, vnde rationibus subductis colligebam, porticus latitudinem esse pedū 100, altitudinem vero cum summo acroterio ped. 82.

Sed dū sumus in porticu, libet pauca de porticibus adnotare, quibus plectis possit lector operū habere delectū. Sunt enim apud quos sola antiquitatis nota nullo discrimine omnia commendat. Hoc mihi nunc ex hac porticu in mentem venit, quę inter præclara antiquitatis opera laudatur. Et tamen si totum opus ad seueriorem normam exigamus, reperiemus ne vitio quidem carere. Autorem habeo Vitruuium. Cum enim quinque sint ei edium sacrarū genera, pignostylos, sistylos, diastylos, areostylos, & eustylos, postremum genus tantum probat, cuius rationes præscribit siue tetrastylos, siue exastylos, siue octastylos constituatur, vt totum opus habeat figurationis aspectum venustum. In octastylo, cuiusmodi est hæc porticus, frons diuidenda est in partes 24. & semissem, ex quibus vna pars sumenda pro modulo, cuius moduli vnus sit crassitudo columnarum. Intercolumnia singula, præter mediana, modulorum duorum & moduli quartę partis, mediana trium. Colūnarum altitudo octo & dimidię partis moduli. Et has rationes testatur sequutum fuisse Hermogenem in Theoctastylo Liberi patris in Asia. Atqui octastylos panthei non conuenit cum hac descriptione. Quid igitur Augusti temporibus, in quę cum multi alij nobiles architecti, tum Vitruuius ipse incurrit, peccari artishuius ignoracione potuit? maxime in ipso aditu nobilissimi templi? non sane. Sed meminerit lector artis præcepta tum demum ad vniuersam seruanda esse, cum loci, & adiacentium natura finit; sin minus, quam proxime fieri possit. Et in eo mihi sane probari videtur ingenium artificis, si possit incommoda quę occurrunt, arti conciliare. In hac porticu non liberum fuit architecto artis præceptis obsequi, cum addititia esset facienda, non ex prima templi designatione. Itaque prioribus operibus

operibus aliquid indulgendum fuit. Tum etiam columnæ ad
 aliunde aduectæ in eius porticus vsum paratæ non fuerant.
 Id cum animaduertisset architectus, atque ideo exquisitam
 rationem seruari non posse, excusationem hanc vitio præte-
 xuit: vt scilicet affectasse videretur in porticu similitudinem
 rationis eius quæ esset in exteriori parte templi. Neque id
 infelicitè cessit, imo vel ex eo iudicium exquisitum eius no-
 tari potest, qui tot obstantibus impedimentis potuerit ope-
 ri pulchritudinem quandam conciliare. Totum igitur opus
 pseudodipteron fecit, exemplo illius nobilis theodastylî. ex
 dipteri enim ratione sustulit interiores ordines columnarû,
 vt fecerat Hermogenes. Artificis igitur in eo solertiam lau-
 do, sed vt exemplar non probo. Quin & Hermogenes ipse,
 a quo tanquam a fonte exempla petit Vitruuius, octastylon
 fecit propter loci præscriptam amplitudinem; non quod hoc
 genus partibus omnibus absolutum existimarit: tametsi Her-
 mogenis æmulus Vitruuius perfectum agnoscat. Sed Vitru-
 uium optarim memorem eorum quæ iam ante professus est;
 aut minus Hermogeni addictum. Iam enim docuit, & re-
 cte, non posse ædem vllam sine symmetria, atque proportio-
 ne rationem habere compositionis, & nisi ad hominis bene
 figurati, compositio rationem habuerit membrorum. De-
 inde ne quis dubitare posset, quæ esset hominis membro-
 rum perfectissima ratio, commensum omnium describit. ne
 putet artifex licere sibi pulchritudinem suo sensu metiri.
 Nam quot fuere nobiles fîctores, & pictores Venerem vnâ
 tantum agnouerunt, eam reiectis alijs coluerunt. Cum igi-
 tur ad hominis bene figurati membrorum exactam rationem
 ædes sacræ extruendæ sint, hominis autem vnus sit tantum
 commeusus, si queratur quænam species mihi præ ceteris pro-
 betur, eustylon tetrastylon omnibus prætulerim. Imo ne re-
 liquis quidem vti velim nisi coactus. Vt ita sentiam in causa
 est symmetria, & symmetriæ fidelis interpret Vitruuius, qui
 postquam aliorum generum vitia notauit, eustyli rationem
 maxime probabilem esse dixit, & ad vsum & ad speciem, &

ad firmitatem rationes habere explicatas. Eius autem rationes sic explicat, vt frons loci diuidatur in partes 18, ex his vna sit modulus, cuius moduli vnus sit crassitudo columnarum, intercolumnia singula, præter mediana, duorum modulorum, & moduli quartæ partis, mediana vero in fronte & postico singula ternum. sic enim, inquit, habebit & figurationis aspectum venustum, & aditus vsus sine impeditiōibus, & circa cellam ambulatio auctoritatem. Triplici argumēto hoc genus commendat, a venustate aspectus, ab vsu, ab operis auctoritate. In quo autem consisteret venustas aspectus, dictum sat esse existimauit. Nempe si ad hominis exemplum, totum opus constitutum esset; id autem nisi in eustylo tetrastylo seruari non potest, quod quia Vitruuius non explicauit, id mihi nunc oneris incumbit. Igitur exempli gratia, frons loci eustylos tetrastylos fiat. Imo quia mathematicorum more operamur, dictum factum existimetur. Tum homo eiusdem altitudinis ita in fronte erectus collocetur, vt pedibus iunctis eisdē insistat plano, cui & plintides columnarum. vertice autem capitis tympani cacumen contingat. Cum ita constitutus fuerit, si brachia pandat quam maxime poterit, totum illud spatium quod inter extremos digitos patebit, erit æquale longitudini coronæ. Vide autem vt ab hominis symmetria ducta ratione, singularum huius operis partium rationē veteres inuestigarint. Columnæ ionicæ vel corinthiæ altitudo cum sua spirā constat ex modulis crassitudinis nouem: octo scilicet cum dimidia parte vnus moduli pro scapo columnæ, altera vero dimidia parte moduli pro spirā. quæ ratio, vt iam ostēdimus ex Vitruuio; a commensu corporis muliebris sumpta est. Deinde cum ad columnarū symmetriam ædes sacras extruere vellent, easdem rationes in toto opere seruauerunt. Cumque totius commensum in fronte vellent explicare, eustylon tetrastylon ipsdem rationibus fecerunt; cuius altitudo esset longitudini æqualis. tota enim longitudine coronæ, quantum patet inter extrema cimatia, in nouem partes diuisa, vt harum vna esset pro modulo, ex ijs partem vnā.

vnā tympano tribuerunt, ei altitudini quæ est a tympano deorsum vsque ad imum reliquas octo partes. Sed quemadmodum columnis in nouem partes diuisis dimidium vnus partis tribuitur spiræ, si eodem modo altitudinem quæ est a fastigio tympani vsque ad imum, in nouem partes diuiserimus, & vnus partis dimidium in imo relinquamus, eadem erit ratio altitudinis tympani ad altitudinē totius operis præter spiram, atque in figura virili eius interualli quod est inter mentum & radicem capillorum, ad totā longitudinem, quæ est ab vertice vsque ad imum totius corporis. Nam a mento ad radicem imam capillorum decima pars est totius longitudinis, secundum Vitruuium: & tympanum decimæ quoque partis esset totius altitudinis, sed eodem autore semper adiiciendum est rationis supplementum in symmetriarum membris: vt cum fuerint in altioribus locis, opera certam habeant magnitudinum rationem. quia inquit, quo altius oculi scandit acies, non facile persequat aeris crebritatem. delapsa itaque altitudinis spatium, & viribus extrita incertam modulorum renūciat sensibus quantitatem. Itaque cum tympanum collocandū esset in editiore loco, adiecta est ei quadragesima pars dumtaxat totius altitudinis eius: qua adiectione tympanum factum est nonæ partis totius altitudinis. Fuere quibus hæc altitudo tympani visa est nimis pressa, sed illi viderint quibus argumentis. Nam si ex solo aspectu pulchritudo iudicanda sit, quot erunt hominū ingenia. tot erunt pulchritudinis species. Imo si ex aspectu artificum dūtaxat, ne id quidē probare possim, nisi ratione perspecta Artifex enim ab arte informādus est, nō ars ab artifice. Et sane late patet cāpus artis, intra cuius terminos possit ingenij sui vires explicare. Si q̄s vero ingenio suo fretus lōgius exspatiari velit, nō sequor, nec iūideo. Sed si quos alliciat, intra ratiōis septa reuocabo quātū poterō. nos itidē vicissim qlibet admoneat, si digrediētes viderit.

Nunc, quod institui, eustyli tetrastyli rationem ineamus. Frons loci quāta est, diuidatur in 11. partes & semissem. ex his partibus vna sumatur, quæ sit modulus, cuius moduli

vnus erit crassitudo columnarum, intercolūnia singula præter medianum duorum modulorū & moduli quartæ partis, altitudo verò columnarum octo modulorum & dimidię partis. tum reliqua omnia quæ supra capitula columnarum collocantur, perficiantur vt ab autore præscribitur: & totius operis altitudo eandem habebit rationem ad latitudinem, quæ est columnæ corinthiæ, ad doricam. Sic eo redit nostra disputatio, vnde dudum profecta est, & hoc tandem pluribus argumentis euincemus, quod initio proposuimus, quadratam figuram dorico dumtaxat generi conuenire. Itaque summa cum ratione negasse Hermogenem dorico genere ædes sacras fieri oportere, quod eius generis symmetrię totum opus respondere non posset. Sæcus verò in corinthio genere, vt iam in eustylo tetrastylo demonstrauimus, & mox in cæteris ostendemus. Sed prius huius eustyli tetrastyli vnum dumtaxat exemplum operis antiqui proferam, templum diuæ Mariæ Aegyptiacę, quaternis columnis in frōte & postico, septenis in lateribus generis ionicī & striatis.

Sed tametsi huius formę symmetria exquisitissima sit, hoc tamen vitio laborat, quod ædes sacrę non ita magnę fieri possunt. Itaque de octastylo videndum est: in cuius constructione Hermogenes artis, & ingenij vires explicauit. Cum enim animaduertisset, hoc genus ab humani corporis symmetria dissidere, & tamen tēplum eius amplitudinis extruere vellet, pseudodipteri rationem excogitauit, quam Vitruuius his verbis explicat. Ex dipteri symmetria iustulit interiores ordines columnarum 38, eaq; ratione sumptus, operisq; compendia fecit. Nihil argutius dici potuit, si locus recte legatur. His enim verbis templi ignographiam graphice descripsit, & totius operis commensum. Sed nulla ratione effici potuit, quin aut plures, aut pauciores columnæ demerentur. Itaque legendum puto 48. pro 38. Venit enim in mentem quiddā, cuius simile memini me videre in vno antiquo numismate: vt scilicet in frōte & postico octastyli quaternę colūne prominere, binę dextra & sinistra introrsus retheren-

heretur vnus intercolūnij spatium. quaternis vero quę promi-
 nebant epistilia zophori, denticuli, coronę, cina, & cymatia
 imponerentur. Hac ratione tota pronai ratio in fronte edis
 explicabatur, & quadraginta & octo columnę dumtaxat de-
 trahendę fuissent. tot enim fuerunt dipteri interiores colum-
 nę. Sed nec inelegans fuisset frontis aspectus. Itaque procul
 dubio 48. pro 38. reponendum censeo. Nec enim aliter hic
 locus vnquam intelligi poterit, neque ex eo existimari quę
 fuerit quondam octastyli pseudodipteri ratio; quę tamen ex
 duobus Vitruuij locis dilucide perspicui potest. In vno pseu-
 dodipteri frons, cum eiusdem latere comparatur his verbis;
 Pseudodipteros autem sic collocatur, vt in fronte & postico
 sint columnę octonę, in lateribus cum angularibus quinde-
 nę. In eo vero loco quem emendare & explicare cępi, ait
 Hermogenem ex dipteri ædis symmetria sustulisse interio-
 res ordines colūnarum 38. Ratio igitur sic ineunda est. Octa-
 stylos ex octo ordinibus columnarum componitur, singuli
 vero ordines ex quindenis columnis: notentur igitur singu-
 li ordines columnarum in fronte his literis a, b, c, d, e, f, g, h.
 Horum ordinum cum bini dipteron efficiant, quatuor erunt
 dipteri in fronte porticus. Primus a, b, secundus c, d, tertius
 e, f, quartus g, h. Iam si ex singulis dipteris interiores or-
 dines columnarum tollantur, nempe b d, e g, nisi in fronte,
 & postico, vbi octonę seruandę sunt, supererunt tantum hi
 quatuor ordines a, c, f, h, sublati quadraginta & octo co-
 lumnis. Vide autoris argutiam, qui ex numero columnarum
 quę demptę fuerant, lectori coniiciendum reliquit, qualis
 esset pseudodipteri ratio, quot quę ex columnis constaret,
 ausus vnus notulę fidei tot rationes cōmittere. Sed ad Her-
 mogenem redeo. Cum is inquam ampliorem ædem facere
 constituisset, quam tetrastyli, aut exastyli rationes pateren-
 tur, octastylon designauit. Sed homini in symmetria exerci-
 tatissimo, & in architectura veterano rationes displicebant:
 cum ad perfectum illud exemplar figurę virilis omnes suas
 cogitationes intenderet. Itaque huic vitio huiusmodi reme-
 dium

dium excogitauit: vt saltem in mediana testudine pronai *ea* symmetria spectaretur, sublati ex duobus interioribus dipteris, interioribus ordinibus columnarum: pteromata vero quæ dextra sinistraq; ad parietes laterum procurrebant, essent dimidię latitudinis, quantũ scilicet spatium relinquit columna sublata ex diptero. Atque etiam in hoc symmetriã hominis seruauit. nam & rationes duplę & triplę in eodem subiecto reperiuntur. Si etenim homo ita componatur, vt stans in pedibus rectus, manus ad pectus retrahat, cubitis passis, totũ inter extremos cubitos interuallũ dimidium est totius altitudinis. Brachijs vero demissis, latitudo ab extremis humeris cõprehenſa subtripla est lōgitudinis. Si vero vno brachio passio altero demisso cõponatur, totius corporis longitudo ad latitudinem sesquialteram rationem habebit. Vide huius symmetrię harmoniã ex rationibus equalitatis, dupla, tripla, & sesquialtera constare. Vnde summa ratione veteres cõstituerũt, vt ad normã corporis humani operũ cõmensus extruerentur, vtque inde tanquã a fonte rationes omnes peterentur, quicquid vero dissideret haud secus vitaretur, quam in musicis dissonãtia. Horum Vitruuius nusquam meminit, quę tamen lectorem iuuabit meminisse. Hermogenes igitur tametsi diuersũ cõmensum seruauit in testudine octastyli, atque in pteromate, nusquã tamen a symmetria hominis discesſit. Hermogenis inuentũ sequuti sũt multi, & qui hãc porticũ pãthei extruxit illud quãtũ potuit emulatus est. & assequut⁹ esset ꝑculdubio, nisi interioris porticus rationes obstitissẽt.

Inter tetrastylon, & octastylon fuit exastylus, cuius rationes etiam explicandę sunt. Habuit exastylus eustylus ſenas columnas in fronte & postico, in eadem sisygia collocatas omnes, vt in porticu templi Faustinae, & in ea quę est in foro Traiani.

Pronai vero distributio hęc erat, vt mediana testudo ex duobus interioribus ordinibus cõstaret, sublati interioribus. Itaque & in edibus quę erãt in antis, crediderim eadẽ ratione sitas fuisse colũnas quę erant in frõte & postico. Vt scilicet quaternæ

terne prominere, bine retraherentur: vt ratio exterior templi cum interiore, consentiret, quemadmodū in octastylo ostendimus. Decastyli exempla nulla supersunt: sed eius rationes tam dilucide explicatur a Vitruuio, vt nemo exemplum desideret. eius verba sunt hæc. Hypæthros vero decastylos est in pronao & postico, reliqua oīa eadem habet quæ dipteros: sed interiore parte columnas in altitudine duplices remotas a parietibus ad circuitionem, vt porticus peristyliorū. Medium autem sub diuo est sine tecto: aditusq; valuarum ex utraque parte in pronao, & postico. In codice Philandri scriptum erat endecastylos, pro quo ille recte decastylos reposuit. Sed tamen in Vitruuio Florentiæ excuso anno 1513, antequam Philander Vitruuium attigisset, legitur decastylos. Sed non animaduertit eodem loco perperam legi altitudine, pro latitudine, quod erratum eiusmodi est, vt possit iudicium lectoris subuertere, cum alioqui locus si recte legatur nihil habeat difficultatis.

De Pantheo tantum me dicturum professus eram, sed ex porticu ad alia templorum genera delapsa est oratio: cum tamen singula ædium sacrarum genera persequi nec fuerit animus, nec si maxime esset, nunc per otium liceret. Ad pantheū igitur redeo, vt tecti etiam rationem exponam. In nulla enim sacrarum ædium parte magis peccari video, nihil a deo ab architectis ignorari. Et tamen si queras quo autore id faciant, Vitruuium prædicant. Ita proculdubio responsurus erat Bramantes de ædícula illa, quam fecit in Ianiculo ad diui Petri in monte Aureo. Nec mirum, cum & ipse Philander nemine percunctante asserat Bramantem in tholo eius ædiculæ Vitruuij rationes esse sequutum. Ego vero opus laudo, ad antiquorum exemplum factum fuisse nego. imo vero diuersa prorsus ratione. Hoc eo dico ne opera recentiorum quantumuis speciosa, ementita antiquitatis specie studiosos fallant, vt & Philander ipse falsus fuit in eo Vitruuij loco, vbi de ædium rotundarū tectis sic scribit. in medio, tecti ita ratio habeatur, yti quāta diametros totius operis erit futura, dimidia

dia altitudo fiat tholi, præter florē. Flos autem tantam habeat magnitudinem quantam habuerit in summo columnæ capitulum, præter pyramidem. quæ verba Philander exponens sic ait. Tholus est alias testudinis vmbilicus, idest veluti scutum in medio tecto, quo trabes omnes conueniunt. Et paulo post supra tholum inquit (mei laternam appellant, Itali tribu nam) fiebat pyramis, supra pyramidem flos addebatur, quod quadantenus imitatus est Bramantes Romæ in ædícula periptera in monte aureo diuo Petro dicata. Cum hæc adnotasset cap. 7. lib. 4. longo postea interuallo cap. 3. lib. 7. stylum vertens sic ait. Tholos quorum mentio facta est, lib. 4. cap. 7. Sed hoc omiseramus, quod proprium est huius loci, intelligimus erectiores testudines templis addi solitas, quas Itali tribunas vocant. hæ sunt aut rectangule. aut ad hemicycliducuntur ambitum. Vide vt sibi parum constet Philander. Porro ne diutius hic immorer quid significare voluerit Vitruuius paucis accipe. Tectum hac ratione fiebat, vt quanta esset diametros toti⁹ operis, dimidia altitudo fieret tholi. His verbis autor interiorem partem tecti describit. Nam pars exterior alijs rationibus constabat, quas nusquam autor explicat. Inde error enatus est, nemine animaduertente hic de altera parte tecti verba fieri. Itaque qui iudicio maxime præstabant, cum viderent hanc tecti rationem extrinsecus non satis oculis probari, aliam excogitarunt. Nos vero obseruauimus tecta ædium rotundarum ita fuisse constituta a parte exteriori, vt præter initium tholi, siue rotundationis tecti, murus continuus ad perpendicularum extrueretur, minimum vsque ad medium altitudinis tecti. In ædibus angularibus eadem erat ratio tecti, atque tympani; in rotundis altius aliquanto faciendum fuit. Cum enim cacumen longius recedat ab oculo quaquauersus spectetur, optices ratio postulat vt aliquid adijciatur altitudini. In cæteris ratio est eadem, atque in ædibus angularibus. In angularibus totius altitudinis templi ad altitudinem tympani eadem debet esse ratio, atque in corpore humano totius longitudinis a vertice ad imum pedum,

pedum, ad eam qua est ab humeris ad verticem, vt videre licet in pantheo, & in eo templo quod Baccho sacrum fuisse dicitur. & item in alio quod est in via Prenestina, & alijs quorum exempla in lucem edere paramus. In quibus omnibus paries templi circa humeros crassior est. Inde vero conuexa templi testudo in vmbilicum contrahitur. Huiusmodi tectum tholus dicebatur. Sed tholi tantum interiorē partem describit Vitruuius, cuius ima pars vtcunque in partes diuideretur, si a punctis sectionum ducerentur striges vsque ad summum, quod est instar vmbilici, totum hemispherium diuisum erat in pyramides, quarum basis erat in imo tholi. Harum cacumina quia non poterant propter latitudinem vsque ad vmbilicum protendi, describebatur centro vmbilici circulus, in quem pyramides omnes coirent, qui flos inde dictus est, quod flos in eo cælaretur, vt & hodie artifices suo Marte faciunt. In reliquo spatio circulos parallelos striatos inæqualibus intervallis ducebant per tholi ambitum, quæ striges singulas pyramides tholi diuidebant in quadrangula altera parte angustiora, in quibus signa vel flores cælabantur. Et hac ratione in pantheo nostro decorata fuit pars interior tholi. Interdum vero pyramides obliquæ per ambitum templi ducebantur, ab imo vsque ad florem, in diuersas partes, quæ sese inuicem interfecantes aliam ornatus speciem præferebant. Huius generis exempla adhuc extant in templo Solis & Lunæ, ad arcum Titi.

Sed & extrinsecus tectum tholi circulis, & pyramidibus distinguebatur, vt in eodem pantheo obseruari potest, & in recentiorum operibus, tametsi imprudenter id faciant. Quemadmodum vero in interiore parte tecti pyramides in florem coibant, itidem & quæ in exteriore parte erant in florem concurrebant, cuius magnitudo tanta erat, quantum capitulum columnæ, cuius scapus ab imo templi surgeret vsque ad cacumen. Hoc enim volunt illa verba Vitruuij. Flos autem tantam ha-


D


beat

beat magnitudinem, quantam habuerit in summo columnæ capiculum, præter pyramidem. Ea igitur tribuna quæ tectis rotundis imponitur, si his proportionibus constet, nihil moror, quominus in locum floris substituatur, habet enim sane venustatem.

Hactenus de Panthei symmetria, ex veteris architecturæ fontibus rationibus deductis, disputauimus. simul ostendimus quid de antiqua eius forma mutatum fuerit. Nam ut nunc est, ita ex prima templi designatione extructum quondam fuisse, nemo harum rerum bonus arbiter his perlectis existimauerit. Quærendus est enim locus caryatidibus de quibus diximus. cum in nulla parte templi huius collocari potuerint, nisi in stylobatum frontibus. Ut inde satis appareat, ad eam saltem altitudinem templum congestitium esse. Et fertur adhuc ostium quoddam sub terra latere, ex aduerso eius quod nunc patet. cuius ostij vsus nullus erat, si templi altitudo eadem semper fuerit, atque nunc est. Altius vero ab stylobatum imo altitudinem patuisse, & gradus in eo fuisse dispositos, non ita ausim asserere: cum nec graduum vestigia supersint, nec eorum ullus veterum meminerit. Sed cum templi altitudinem quadantenus interceptam fuisse deprehendissem, quod supererat altitudinis ex coniectura supplendum fuit, ut implerentur numeri symmetriæ. Et nisi ita fuerit ut dixi, non satis emendatum fuit opus. Sunt tamen qui contendant, lithostratum hoc variatum ex marmore antiquum esse. Sed à prima templi ædificatione ita factum fuisse nego, & falsum esse ostendimus. De puteo etiam qui est in medio templi, leue est argumentum. Quocirca his non obstantibus in ea sum sententia, imam templi altitudinem interceptam fuisse, & esse nunc congestitiam.

Disputauimus etiam de octastylo Hermogenis, & ni fallor Vitruuij locū illustrauimus, sed figura prætermissa est, quæ templi ignographiam ostenderet. Quocirca ne quid ad eius loci explicationem desideretur, hic eam lectori exhibemus.





ILLVSTRISSIMO ET REVERENDISSIMO D.

FRANCISCO DE GIOIOSA S. R. E.
CARDINALI AMPLISSIMO.



VM priscorum monumenta Romę
lustro, nihil vsquam vidi, quod o-
culos præ sculptura, & pictura te-
nuerit. In his antiquorum artem,
& solertiam miratus sum. Potuisse
marmore, & in tabula, vultus, mo-
res, animum exprimere. nec homi-
nes modo nobilitare, verum etiam
Deos ipsos gentium, si plusculum operæ in eis fingen-
dis, vel pingendis insumtum esset. Vt de Venere illa Pra-
xitellis fertur, quam vt viderent multi Gnidum nauiga-
runt. et de Ioue illo Olympio Phidiæ arte nobili. vt Ap-
pellis, aliorumque innumera sculpturæ, & picturæ ope-
ra fileam, quorum memoriam Plinianæ chartæ ab inte-
ritu vindicarunt. vnde ego hæc in meos commentarios
transtuli. non vt auctori decoquerem; sed vt quæ apud
eum paulo obscuriora videbantur explicarem, simul e-
mendarem, quæ scripturæ vitio corrupta erant. Quæ cū
in duo parua volumina digefsisssem, visum est geminis
fratribus, patronis meis obseruandissimis, duo germa-


na opera consecrare. tibi hoc de sculptura, ex celebrioribus huius artis operibus veluti conflatum opus. fratri Illustrissimo alterum de pictura, quod item illi tot nobilium operum antiquorum instar esset. fausto omine æternæ amborum memoriæ, quæ sic statuis, & picturis, virtutis ergo decorari possit, sic in multa sæcula propagari.

Amplitudini vestra

Deditissimus ser.

Lud. Demontiosius.

LVDOVICI DEMONTIOSII
COMMENTARII DE SCVLPTVRA,
ET PICTVRA ANTIQVORVM.



SCVLPTVRA,



ERV M similitudines exprimere, & quicquid orbis complectitur imitari, ars adeo nobilis quondam fuit, ut ea quę dignata esset posteris tradere nobilitare posset. quę fictorū, & pictorū propria laus semper fuit, dubia adhuc inter eos palma Fictorū vero duo sunt genera. Vnum eorum qui signa faciūt, quę quaquaverius spectentur naturę opus æmulantur. Alterum est eorum, qui quantum cuiusque corporis vno aspectu cerni potest, id tanquam in tabula sibi imitandum proponunt. Sed ne hi quidem in eodem genere vertantur: aut enim opus eminet ē tabula, aut intus refugit: de quibus singillatim dicemus. Sed materia etiā artifices distinguit. alij enim ex molli materia signa faciunt, alij ex fusili, alij ex dura. & fuere quondam in singulis generibus clari artifices. Sed omnium antiquissimi fuerunt plastę, qui mollem, & ductilem materiam tractarunt: a rudibus initijs progressi. scribit enim Plinius Dibutiadem Sicyonium figulum primum eam artem inuenisse, Corinthi filię opera, quę capta amore iuuenis, illo abeunte peregre vmbra ex facie eius ad lucernam in pariete lineis circumscripsit, quibus pater eius impressa argilla typum fecit, & cum ceteris fictilibus induratum igni proposuit: eumque seruatum in nymphæo, donec Corinthum Mummius euerteret. Addit tamen, esse qui Samo primos

A omnium

omnium plasticen inuenisse Reum, & Theodorum tradant, multo ante Bariadas Corintho pullos. Demaratum vero ex eadem urbe profugum, qui in Hetruria Tarquinium Priscum regem Populi Romani genuit comitatos fictores Euchira, & Eugrammum: ab ijs Italiae traditam Pasticen. Sed cur pigeat reliqua eius loci ad verbum exscribere? cum eius diligentiae tota huius antiquitatis cognitio accepto ferenda sit, nec quicquam elegantius, aut magis distinctè dici possit. Pergens igitur sic ait. Dubitadis inuentum est rubricam addere, aut ex rubrica cretam fingere. Primusque personas tegularum extremis imbricibus imposuit, quae inter initia protypa vocauit. Postea idem ectypa fecit. Hinc & fastigia templorum orta, propter hunc plastae appellari. Hominis autem imaginem gypso è facie ipsa primus omnium expressit, ceraque in eam formam gypsi infusa emendare instituit. Lysistratus Sicyonius, frater Lysippi, de quo diximus. Hic & similitudinem reddere instituit, ante eum quam pulcherrimas facere studebant. Idem & de signis effigiem, exprimere inuenit. Creuitque res in tantum, ut nulla signa statuave sine argilla fierent. Quo apparet antiquiorem hanc fuisse scientiam, quam fundendi aeris. Plastae laudatissimi fuere Damophilus, & Gorgasus. iidemque pictores, qui Cereris aedem Romae ad circum maximum utroque genere artis suae excoluerunt, versibus inscriptis graece, quibus significarunt à dextra, opera Damophili esse, à parte laeva Gorgasi. Ante hanc aedem Thuscanica omnia in aedibus fuisse, autor est M. Varro. Ex hac cum reficeretur, crustas parietum excisas tabulis marginatis inclusas esse. Item signa ex fastigijs dispersa. Fecit & Calchoesthes opera cruda Athenis, qui locus ab officina eius Ceramicos appellatur. M. Varro tradit sibi cognitum Romae Posim nomine, à quo factas Romae vuas, item pisces, ita ut non sit aspectu discernere à veris. Idem magnificat Archesilaum L. Luculli familiarem, cuius proplasmata pluris venire solita artificibus ipsis, quam aliorum opera. Ab

hoc factam Venerem genitricem in foro Cæsaris, & priusquam absolueretur festinatione dedicandi positam. Deinde ei à Lucullo HS. LX signum felicitatis locatum, cui mors vtriusque inuiderit. Octauio equiti Romano cratera facere volenti exemplar e gypso factum talento. Laudat & Pasitalem, qui plasticen matrem statuariæ, sculpturæque, & cælaturæ esse dixit. Et cum esset in omnibus his summus, nihil vnquam fecit antequam finxit. Præterea elaboratam hanc artem Italiæ, & maxime Hetruriæ. Turlanumque à Fregellis accitum, cui locaret Tarquinius Priscus effigiem Iouis in Capitolio dicendam. Fictilem fuisse, & ideo miniari solitum. Fictiles in fastigio templi eius quadrigas, de quibus sæpe diximus. Ab hoc eodem factum Herculem, qui hodieq; materiæ nomen in vrbe retinet. Hæ enim tum effigies deum erant laudatissimæ. Hæc sunt verba Plinij: in quibus nescio an lector mendum animaduertent. Ego sane locum suspectum habeo, vbi ita legitur. Primusque personas tegularum extremis imbricibus imposuit, quæ inter initia protypa vocauit. Postea idem ectypa fecit. Hinc & fastigia templorum orta, propter hunc plastæ appellati. Vtrumque hoc fallum est. inde fastigia templorum orta, & a Dibutiade plastas appellatos. Et falso hoc auctori ascribitur. aliud enim significare voluit. Nempe, Dibutiadem primum fastigijs templorum fictilia signa imposuisse. Extrêmæ enim imbrices fastigio incumbunt, à quibus per colliquias stillicidiorum aqua in compluium deijcitur. Qua igitur imbrices fastigio incumbebant, ibi signa collocabat Dibutiades, & qui postea sequuti sunt. Plin. lib. xxxvj. cap. v. Pantheum decorauit Diogenes Atheniensis, & Cariatides in columnis templi eius probantur inter pauca operum, sicut in fastigio posita signa, sed propter altitudinem loci minus celebrata. Inde igitur quod plastes primus fastigia ornasset, obtinuit vt fastigia ornata figuris plastæ dicerentur. Locus igitur paucis mutatis sic legendus est. Primusq; personas tegularum extremis imbricibus im-

fuit, quæ inter initia protypa vocauit, postea idem ectypa fecit. Hinc fastigia templorum ornata, propter hunc plasta appellari. Sic enim lectio perspicua erit. vnde hoc discemus, quod alibi nusquam reperitur, fastigia signis ornata plasta vocari, cuiusmodi est illud fastigium ædificij recentioris in Capitolio, quod ornamenti genus beneficio Plinij, nostra opera restituti, post hac exprimi poterit vno verbo. Hoc volebam lector nescius ne esset. Sed quia imbrices, & imbricata sunt coniugata, rogat Vitruuius vt se aspiciam. Vitij enim aliquid esse vbi de imbricato opere loquitur lib. 2. cap. 8. Et sane toto eo capite perlecto vnus tantum literulæ mutatione locum laborare animaduerti: male enim incertum, pro insertum legitur in duobus locis. Nolim lectorem pigeat integrum caput perlegere, quum breue admodum sit. Structurarum inquit, genera sunt hæc, reticulatum, quonunc omnes vtuntur, & antiquum, quod insertum dicitur, ex his venustius est reticulatum, sed ad rimas faciendas ideo paratum, quod in omnes partes dissoluta habeat cubilia, & coagmenta. Inserta vero cementa alia super alia sedentia, interseque imbricata, non speciosam, sed firmiorem quam reticulata præstant speciem. Hactenus locus satis indicat structuræ genus insertum dici, quum cementa alia in alia inseruntur, inter se velut imbricata. Cementa enim sic posita efficiunt imbricis speciem, in quam pars quædam tertij cimenti inseritur, vt in lateritia structura fieri videmus. Inde structuræ genus insertum dicebatur. Sed vnde digressi sumus, ad plasticam redeamus, quam non immerito Pasiteles matrem statuariæ, sculpturæ, & calaturæ esse dixit, quippe quæ ab ea tanquam à furculo prodeant, vt idem Plinius alio loco docet de Zenodoro illo scribens, qui Aruernis immane illud Mercurij simulachrum immenso pretio per annos decem finxit pedum CCCC; nisi potius quadraginta pro quadringentorum legimus, quum error ex vocum similitudine

dine facile obrepere potuerit. Lector enim secum putet molis immensam altitudinem. Imo proculdubio ita legendum est vt dico. ex verbis enim Plinij apparet simulachrum illud artis experimentum dumtaxat fuisse, & tanquam meditationem maioris cuiusdam operis. ait enim, quum artem satis ibi approbauisset, Romam accitum à Nerone destinatum illius principis simulachrum colosseum fecisse CX. pedum longitudine. Quis enim credat, cum iam Aruernis quadringentorum pedum simulachrum fecisset. de hoc altero longe minore cogitasse postea Neronem. At quem Principem? tumidum, vanum, prodigum. Sed & colossus ille Rhodiorum septuaginta cubitorum tantum fuit, qui terræ motu prostratus, iacens etiam miraculo fuit. Profecto non est librarijs pronior in errorem lapsus, quam vbi occurrunt numeri, qui tum notarum, tum etiam vocum similitudine sepe fallunt. Eiusmodi multa scripturæ vitia deterimus in ijs quæ edituri sumus de notis numerorum. Quod igitur scribit Plinius omnem amplitudinem statuarum eius generis vicisse Zenodorum, de simulacro Neronis intelligendum est, quod colossus illum Rhodiorum superabat, quum fuerit Neronianus longitudinis ped. CX; Rhodius vero lxx. cubitorum, qui CV. pedes tantum efficiunt. Omnes igitur statuas molis magnitudine superauit destinatum illud Neronis simulachrum, quod Plinius se vidisse testatur, simul admiratum non modo ex argilla similitudinem insignem, verum & ex paruis admodum furculis, quod primum operis instar fuit. Potuit igitur sola plastice spectantium oculos tenere, & in admiratione adducere. Nec mirum, colossorum enim audacia primum in argilla spectata fuit, & ars in ea tota perspecta, vt nihil amplius, præter æris fusionem, & emendationem accedere posset. Imo nec marmoris manus audeat ad mouere artifex, nisi prius, quod totius operis instar sit, ex argilla proplasmata formauerit: interdum plura, vt quod in singulis maxime probauerit, id sibi imitandum proponat. Atque ita ex ijs furculis surgit opus. Recte igitur Pasiteles plasticen matrem.

matrem statuariæ, & sculpturæ esse dixit. Quocirca cum in his omnibus summus esset, nihil vnquam fecit antequam finisset. & multalij egregij pictores idiplum factitarunt fælici admodum successu. In toreumate enim videre licet, quemadmodum extremæ lineæ figurarum desinant, quid lateat, quid cerni possit, quomodo umbræ sint à lumine diuidendæ, quæ partes corporis recedant, quæ emineant. quod denique natura fictori est, fictor est pictori. Nec piguit nobiles artifices terram manibus tractare. si quidem olim fictiles Deorum imagines fuerunt laudatissimæ. Fuit Iouis in Capitolio à Tarquinio dicata, fictiles in fastigio templi quadrigæ, fictilis Hercules qui à materia nomen in vrbe sortitus est. Quin & fastigia templorum in vrbe fuere crebra, n.ira cælatura, & arte. Cæterum Dibutiades ille, qui primus hominis imaginem gypso è facie ipsa expressit, ceræque in eam formam infusa emendare instituit, artem aperuisse videtur, hoc enim erat huic rei caput. Sed nec tantum excipiendis formis vtile fuit gypsum; quin etiam excalpendis cælaturis materia admodum oportuna semper visa est, sed fragilis. Vfus eius in Gallia frequens est, & quondam fuisse nomen ipsum indicat, *plastre* enim proculdubio à *plastice* dicitur. Plinius autor est, antiquos statuas bitumine pinxisse, & deorum dumtaxat simulachra primum fieri solita. A dijs inquit, ad homines statuarum honos translatus est, si qua illustri causa perpetuitatem merentur. Primò sacrorum certaminum victoria, maximeq; Olympiæ, vbi omnium qui vicissent statuas dicari mos erat: eorum verò qui ter ibi superauissent ex membris ipsorum similitudine expressa, quas iconicas vocabant. In Italia statuarum vltus antiquissimus est. argumento est Hercules ab Luandro sacratu, vt fertur, in foro Boario, triumphalis vocatus. Regum etiam statuæ in Capitolio fuerunt, vt Tarquinij Prisci. Sibyllæ etiam tres iuxta rostra fuerunt. Eiusdem antiquitatis erat Actij Nauij. Parcior primum earum vltus, quum nec Euryto, qui reges expulerat posita fuerit.

rit . Postea vero cuiusque arbitrato . Ab exteris quoque poni coepta, ijs in quorum clientelam recepti essent, vel qui eos laborantes subleuassent . Denique etiam hostium posita statuae , vt Annibalis tres in Vrbe , omni discrimine sublato . Sed quae in foro erant, sublatae fuerunt omnes à P. Cornelio Scipione , & M. Popilio Censoribus , praeter eas quae Senatus, aut populi sententia statuta essent . Pedestres Romae in autoritate fuere longo tempore . tametsi Equestrium origo Romae antiqua est . quo etiam honore foeminae decoratae fuerunt . Cloeliae enim statua equestris erat . Huic primum , & Horatio Coclitii publice dicatas existimat Plinius . Non eiusdem antiquitatis fuerunt bigatae , eorum qui praetura functi curru vestiti essent per circum , & quadrigatae eorum qui triumphassent . quod etiam ab Imperatoribus deinde usurpatum fuit . quo exemplo Titus exalptus est in arcu triumphali Romae , & M. Aurelius in tabula marmorea , quae est in Capitolio . Augustus solus seiugibus , sicut & elephantis spectari voluit . Graeci nihil velabant , Romani togam addebant , qua etiam honoris causa statua Cloeliae virtutis ergo ornata est . Fuit & Q. Marci Tremuli equestris togata : Remuli siue tunica , & ea quae Camillo in rostris ante aedem Castorum dicata fuit . Fuere , & nudae tenentes hastam , ab epheborum gymnasticis exemplaribus . Militare erat thoracas addere . loricata Caesari dictatori in foro dicata est . Fuere etiam , sed inferioris antiquitatis , & lupercorum habitu , & quaedam penulis indutae . Tripedanae vero primum statuae ponebantur . haec scilicet mensura honorata tunc erat : deinde maiores factae sunt . Demum eo euecta est artificum audacia , vt colosseas imagines instar montium facerent , immenso pretio . Primum quidem dijs tantum . eiusmodi fuit in Capitolio Apollo x x x . cubitorum C L . talentis factus . Fuit in campo Martio Iupiter à Claudio Caesare dicatus . Fuit & Tarenti x l . cubitorum , opus Lysippi . Quos omnes superauit magnitudine

dine colossus ille Rhodiorum Soli dicatus, quem Chares lydius xij. annis effecit CCC. talentis: cuius altitudo fuit lxx. cubitorum. Fuere centum alij minores in eadem vrbe. Præter hos Deorum quinque, quos Briaxis fecit. Fecit & Zenodorus in Galliæ ciuitate Aruernis Mercurium quadragenum pedum, sic enim legendum esse docuimus. At tametsi huiusmodi statuæ propriæ essent Deorum, eo discrimine sublato principes ijsdem honorari voluerunt. quinimo, vt iam ostendimus, statuas omnes quot olim fuisse traduntur, magnitudine superauit ingens illud simulacrum Neronis, quod insaniam modum imposuit, non arti, quæ etiam vltra has metas progressura erat, si principis itidem vesania potuisset. Alij contra exilibus operibus laudem quæsierunt, vt Myrmecides cuius quadrigam cum agitatore cooperuit alis musca. & Callicrates cuius formicarum pedes, atque alia membra peruidere non erat. Theodorus etiam cum se ex ære fudisset, præter similitudinem mirabilem, hoc etiam in eo opere commendabatur, quod dextra limam teneret, laua tribus digitis quadrigulam tantæ paruitatis, vt totam eam, currumq; & aurigam integeret alis simul facta musca. Pomponius Gauricus in libro de sculptura annotauit, statuas quæ intra humani habitus mensuram fierent, signa vocari: cubitales autē, aut cubito minores sigilla; pariles, quum eius qui exprimitur staturam referunt: magnas verò quæ intra seique alteram rationem staturæ erant: maximas quæ parilium triplæ, aut eo maiores essent. Addit Philander, pariles dari solitas bene meritis, ac sapientibus viris, magnas verò regibus, & imperatoribus, maximas autem dijs, & heroibus; quamuis eas reges, & imperatores vsurparint. Sed viderit Gauricus an huic obseruationi fidem adstruere possit, quum aperte dicat Plinius primum tripedaneas statuas in foro positas benemeritis, quod ea mensura honorata tunc esset, quum & eius mensuræ quædam adhuc in vrbe spectentur deorum signa antiqua, ipsius etiam Iouis in palatio Illustrissimi Cardinalis Medici, & celebriora signa deorum quæ hic nobis videre

videre contigit. Excedunt quidem communem hominum mensuram, ita suadente ratione optices, vt in loco superiore collocata parilia videri possint. cū aliquid semper distantia intercipiat. Sed Antinoi qui est in Vaticano, eadem statura est atque Apollinis. Statuę autem Alexandri bucephalum domantis quę sunt in monte Quirinali, maiores sunt omnibus signis deorum gentilium, quę in Vrbe extant. Dearum etiam statuę ferē omnes quas hic vidi, non longe distant à communi mulierum mensura. Contra Sabine quę sunt in eodem palatio, duplo, aut eo amplius hanc mensuram excedunt. vt & Niobe quę ibidem spectatur. Itaque nescio vnde ea venerint in metem Gaurico. Hoc vero non prætereundum, quod Philander annotauit, statuas quę dijs fiunt vocari *εἰδωλα*, quę heroibus *ξόανα*, quę regibus *ἀνδρείωντας*, quę sapientibus *εἰρηνα*, quę benemeritis viris *βρεῖλα*. Alia est differentia statuarum, quam nosse operepretium est. Aut enim nature varietatem persequitur artifex, aut quod in natura perfectum est. Ille rem imitatur vt est; hic difficilius quiddam persequitur. Quanquam enim perfecti vna tantum est species, in ea assequenda præcipua laus est. Fugit enim imperitum vulgus, nec oculis vestigari potest, nisi ratione præeunte. mille enim species obijcit persequenti, omnes indiscrete fere similitudinis, quarum fucus non nisi a ratione deprehenditur. hæc formas omnes ad symmetrię normam exigit, vt cuiusque fuerint sexus, etas, dignitas, mores. In alijs forma quadrata probatur, in alijs gracilis, in quibusdam torosa, in alijs tenera. in quibusdam obesa, in alijs exhausta. Nec omnes eadem positura decet, non idem vultus. vnde infinita propemodum varietas formarum prodit. Ad quas discernendas opus est artifice exercitatissimo, arte instructo, & iudicio præstanti. Formę igitur à natura præscriptæ fuerunt fictori, materia non item. Eius enim indifferens semper fuit electio, cum ex qualibet tractabili materia nobilia opera facta fuerint. vt ex argilla, ex metallo, ex ebore, ex lapide, ex ligno. Ex metallis, es maxime oportunum visum est, & quia

parabile, & quod facile tractari possit. Ad statuatum vsum temperabatur tertia parte æris collectanei, additis plumbi argentarij pondo duodenis ac selibra in centenas æris. ita temperatum regulare dicebatur. Fuit & alia temperatura tene-rior, formalis dicta, iniecta nigri plumbi decima portione, & argenti vicesima. Temperabatur etiam ternis, aut quaternis libris plumbi argentarij. idque in olla, vnde ollaria tempera-tura. Aegineticum à temperatura nomen, & laudem inuenit, quanquam ibi non nasceretur. maximè verò Myronis operi-ribus nobilitatum, quod eo vteretur, vt deliaco Polychetus. Color etiam metalli hac temperatura mutabatur in eum qui Græcanicus dictus est. Sed & præclarissimæ Urbis excidio ma-xime nobilitatum est æs quod capta, & incensa Corintho ca-sus miscuit, tâta circa id priscorum affectatione, teste Plinio, vt plerique elegantiores e mentito nomine pro Corinthijs sta-tuas ostentarent artificum qui ante captam Corinthum de-cessissent. Eius quatuor genera discernit. Candidum ad argē-ti colorem proxime accedens. Alterū auri specie nobile. Ter-tium in quo nullum præualeret, æquali omnium tēperamen-to. Et quartum iocinoris colorem referens, vilius Corinthio, sed Deliaco, & Aegynetico prætiosius. Sed nec argento, & auro puro pepercerunt artifices. Fuit enim Romæ argentea Augusti statua, cum & longo ante tēpore in triumpho Pom-peij Pharnacis quoque argentea translata fuisset. Et item alia Mithridatis Eupatoris. Signa item aurea Mineruæ, Martis, & Apollinis fuerunt. Auream statuam nulla inanitate, qualis nec ex ære vlla antea visa rebus Parthicis diripuit Antonius. Auream sibi Gorgias Leontinus primus omnium Delphis in templo posuit. Sed tamen argento & auro nulli artifices incla-ruerunt, ære & marmore multi. Marmoris varias species enu-merat Plini⁹, quarū descriptiones lector ex eo petere poterit.

De artis huius origine idem Plinius autor est cum Olym-piadam origine cœpisse. Primos autem omnium inclaruisse Dipoenum, & Scyllum Cretenses, olympiade circiter L, am-bos Apollinis oraculo nobilitatos. Cum enim ijs Sicyonij
deorum

deorum quorundam simulacra locauissent, iniuria quæsti infecto opere abierunt. Sed cum Protinus Sicyonios fames & sterilitas inuasissent, consulentibus oraculum ecquis finis malorum futurus esset Apollo respondit, si Dipoenus, & Scyllis deorum simulacra perfecissent. Post hos Bupalus & Anthermus Chij Olimpiade lx. claruerunt, adeo sibi suæ artis conscij, vt ijs quæ in Delo fecere subijcerent non vitibus tantum censerî Chium, sed & filiorum Anthermi operibus. Romæ etiam temporibus Augusti signa eorum celebrabantur. Et tamen ars in dies excolebatur. vt demum eam Phidias Olymp. lxxxiiij. aperuisset, ac demonstrasse dicatur, Polycletus vero consumasse, ac erudisset Olymp. lxxxviij. Idque vel in eo maxime apparuisse, quem artifices canonem vocabant, lineamenta artis ab eo petentes velut, à lege quadam. Hic etiam primus excogitauit vt vno crure signa insisterent. Sed & hic corpora fecit quadrata, & omnia pene eodẽ exemplo. Sequutus deinde Myron, de quo Plinius his verbis, Primus hic multiplicasse varietatem videtur, numerosior in arte quam Polycletus & Symmetria diligētior; & ipse tamen corporum tenuis curiosus animi sensus non expressit, capillumq; & pubem non emendatius fecit quam rudis antiquitas. Lysippi propriæ videntur argutiæ corporum in minimis quoque custoditæ. Hæc Plinij verba ostendunt artem ad summum nondum peruenisse. Itaque & Myronem à Pythagora Rhegino superatũ fuisse dicit, & à Leontio. Mirum cum iam artẽ Phidias aperuisset, & demonstrasset, Polycletus cõsummasset, Myron & ipse plura contulisset, nondum tamen Symmetriæ partes impleri potuisse, non sensus animi exprimi, nec capillũ satis accurate. Primus enim post eos Leontius capillũ diligētius expressit, & neruos, & venas. Lysipp⁹ vero, præterquã quod capillũ diligentius imitatus est, plurimũ artem & ipse prouexit, capita minora faciendo quam antea solerent, & corpora graciliora, siccioraq; , per quæ proceritas signorũ maior videretur. Euphranor primus dignitatẽ heroũ expressisse videtur, & vrsupasse Symmetriã, qui floruit Olymp. ciiij. cum

Praxitele. Hęc si vt propria recentiores isti vindicent, mirũ in quo antiqui tã opere excellere potuerint. In quibus est Phidias nulli veterũ postponendus. Si enim hęc omnia ignorauerit, ne inter mediocres quidem artifices censeretur debuit, nec eius opera probabilia videri. Sed vt sua cuique laus tribuatur, æquo hic lectore opus est. Enimuero cum docere vellet Plinius artem ad summum peruenisse, nec vllum tamen artificem reperire posset qui omnes numeros impleuisset, recenset in quo singuli maxime claruerint. Hic Symmetrie studiosior, ille varietate fecundior, animi sensus alius expressit, alius in capillis exprimendis superauit, cum in singulis his alij paulo negligentiores, operis tamen vniuersitate præstarent. Et sane infœlicis ingenij est in omnibus vinci. contra in omnibus excellere plusquam humani. Perfectæ igitur & cõsummatę artis exempla sunt hęc, non artificum inuicem iusta cõparatio, vt sciat lector quid in singulis æmulari debeat, non quid in singulis damnare. Nec tamen in omnibus adeo insudabit vt nihil vnquam satis absolutum p̃ter, nunquam diligentię finem faciens, vt Callimachus ille semper calumniator sui, nescius modum adhibere diligentię, ob id Cacizotechnos appellatus. Cuius operibus alioqui laudandis, gratiam omnẽ diligentia nimia abstulit. Quo vitio etiam Sillanion laborauit, alioqui & ipse clarus artifex, sed suorum operum iniquus iudex, qui crebro etiam perfecta signa frangebatur, sibi ipsi non satisfaciens. Quod etiam vitium Appelles modeste in Protogene notauit. in ceteris omnia sibi cum illo paria esse dicens, aut illi meliora. Sed me iam lōgius digressum Apollonius, & Tauriscus reuocant, insignes artifices ambo, nec raptim transcurrendi. quorum adhuc extat, imo viuut opus nobilissimũ in palatio Illustrissimi Cardinalis Farnesij, vt vel ex Plinij descriptione facile manus agnoscantur. Zetus & Amphion, & taurus, vinculumq; ex eodem lapide, à Rhodo aduecta, artis & naturę certamen. Eiusdẽ etiam Apollonij extat in Vaticano corpus, capite, brachijs, & tibijs truncatum, ex marmore. quod fragmentum nulli cedit operum antiquorum quæ

quæ extant hodie Romæ. Basi nomen auctoris inscriptum est. Laocöonem autem illum quis saltem fama non nouit? quod etiam dum in Vaticano artis miraculum ostentatur, spectantibus horrorem incutiens, artis statuariæ cum poetica certamen, & vtriusque cum ipsa natura, palma dubia. Quantum enim Virgilius carmine, tantum isti marmore contendunt. Stupendum opus. ex vno lapide parens, & liberi, horrendi draconum nexus, patris angustię liberorum gemitus expressi. opus inquit Plinius, omnibus & picturæ, & statuariæ artis præferendum. quod de consilij sententia fecerunt summi artifices Agæsander, & Polidorus, & Athenodorus Rhodij. Sunt etiã in eodem septo alia probatissima signa. Apollo ille arcũ tenēs emissã sagitta, & Antinous eximię pulchritudinis.

Primores illos artifices alij sed obscuriores emulati sunt. Phidiam Alcámenes, Critias, Nestocles, Hegeas, Scopam Briaxis, Timotheus, Leochares, qui pariter cum illo mausoleum cęlarunt, vt manus etiam certarēt. Telephanes, alioqui obscurus, equabatur Polycleto, Myroni, atque Pithagoræ, artificum suffragijs. Cephisodorus Praxitelis filius, rei, & artis eius hæres. Comparabantur etiam artifices operum indiscretis manibus, vt in templo Apollinis Sosiani Nioben cum liberis morientem Scopas, an Praxiteles fecisset. & Ianum patrem in suo templo dicatum ab Augusto. Par hesitatio fuit de Cupidine fulmen tenente. Praxitelis Venus illa Gnidia in primis eius operibus commendabatur. Fuit, & Scopæ Venus in templo Bruti Callaici Gnidiæ illi prælata. Certauere etiã Phidias & Praxiteles. cuius certaminis præclara extant monumenta Romæ in monte Quirinali. duæ statuæ Alexandri Bucephalum domantis, alterum opus Phidiæ, alterum Praxitelis. Non prætereundus est Diogenes Atheniensis qui Pantheum Agrippæ egregijs operibus decorauit, inde vicissim & ipse non parum ornamenti consequutus. Eius inter cætera probabantur Cariatides in columnis templi eius, & signa in fastigio posita, de quibus alias dicemus.

CAELA-

CÆLATAVRA.



Cælatura altera sculpturæ species sequitur, medium quiddam inter picturam, & statuariam, ut Plinius adnotasse videtur, cum in vasis argenteis suorum temporum luxum arguens, Nullum inquit genus officinæ diu probando nunc Furiana, nunc Clodiana, nunc Gratiana. Etenim tabernas mensis adoptauimus, nunc Anaglypta, in asperitatemq; excisa circa linearum picturas quærimus. Recte Plinius. nam Anaglypta, & in asperitatem excisa pictura lineari primum adumbrantur, ut quicquid picturæ terminis includitur intumescat. Illud igitur pictoris, hoc fictoris est. Cælaturam pictura lineis circumscribit, has inter, corporis dimidiatum ambitum imitatur cælatura, ab eminentioribus primum incipiendo, quæ longius à superficie tabulæ recedunt. Ab ijs ad depressiora, & minus extatiam manus accliuus delabitur, ad planâ vsque tabulæ superficiem, molliter in extremas lineas desinente summa operis: ut quod fugit potius existimare, quam desiderare cõtingat. Sed argento & auro cælando compendiarie artis ratio excogitata est. In laminas ducto primû metallo, styli cuspide paulum retusa ex altera parte tabulæ forma procuditur, ut in auersam partem surgat opus. diuersa prorsus ratione ab ea quam modo explicauimus. hic enim à depressioribus ad eminentiora paulatim surgit artificis manus; in illa contra ab eminentioribus ad depressiora. Vtroque genere veteres argento cælasse cõperio. Anaglypta primum in asperitatem excidendo, ut ex Plinio ostendimus. idque ad vasa & pocula, & si qua fuerunt eiusmodi. Vel laminas in operimenti vsum tenuando crustarum instar. vnde & Teucro de quo idem Plinius xij. cap. lib. xxxij. meminit, crustarij nomen inditum est ab artificio. Hoc operis genere milites vaginas, & baltheos ornabant, cum ebur fastidii cœptum esset. Sed & huius ornamenti duplex genus fuit:

Delia-

Deliacum ex tenuibus crustis altera parte cauis, altera turgentibus. Punicum quod solido opere fiebat, nulla subtus inanitate. Lectos vero mulierum inquit autor, iampridem totos operiri argento, & triclinia quædam, quibus argentum addidisse primus traditur Caruilius Pollio eques Romanus; nõ vt operiret, aut deliaca specie faceret, sed punica. Cæterum cum auro, & argento nullo discrimine veteres cælauerint, miratur Plinius auro inclaruisse neminem, argento plurimos. Laudatus est in primis Mentor. Hunc proxime æmulati sunt Acragas, Boethus, & Mys. Proximi ab his fuere Calamis, & Antipater: quique Satyrum in phiala grauatum somno collocauisse, verius quam cælauisse dictus est Sttatonicus. Laudatur etiam Cyficenius Tauriscus. Item Ariston, & Eunicus Mitylenei, Hecathæus, & Praxiteles, alius ab illo qui inter sculptores. Posidonius Ephæsius, Lædus Stratiates, Zopyrus, qui Areopagitas & iudicium Orestis fecit pondo xij. æstimatum, & Pithias cuius binæ vnciæ xx. venierunt. & Teucer crustarius, qui etiam famam habuit. Præter hos Ariston, idem statuarius. Leslocles, Prodorus, Pithodicus, Polignotus pictores. Marmore Scopas, Briaxis, Timotheus, & Leochares cælarunt. Diogenis esse suspicor quæ sunt in porticu Panthei. Ligno diuinus ille Alcimedon claruit, famam æternam Virgilij versibus consequutus. Sed & statuarij omnes cælarunt. Nam Phidias scuto Mineræ quam fecit Athenis vel maxime laudatur. in quo referente Plinio in eodem loco, prælium Amazonum cælauit in tumefcente ambitu palmæ. eiusdem concava parte deorum, & gigantum dimicationem. In soleis vero lapitharum, & centaurorum. In basi genesis deorū. In numismatibus etiā priscorū manus veneramur, ætates etiā artificū discernimus, artis progressū, & interitū notam⁹. Nā vt de Romanis loquar, vetera illa cōsulū numismata inter artis initia quàm rudē admodū speciē præferūt. Ab Augusto vero integro sæculo ars claruit, Rursum ignoratiæ caligine demersa, gratiā omnē amisit. Quamquā Plinius lōge ante sua tēpora cælaturā exoleuisse scribat.

cum

cum laudatos illos artifices recensens, Teucrum crustarium ultimum faciat. Vt iam suis temporibus scribat, artem sola vetustate cenferi solitam, vsque adeo attritis cælaturis, vt figura discerni non posset, operis tantum autoritas constaret.

¶ De Gemmarum Scalptura.

GEMMIS imagines cælantur, aut scalpuntur. Cælatae dicuntur, si e plana superficie opus emineat. scalptrae cōtra si opus refugiat. cuius tamen forma excipi possit cera, vel alia facili materia. Vtroque genere veteres inclauisse, vel quæ adhuc supersunt eorum opera testantur. Ex gemmis, achates maxime semper oportuna visa est cælatura, propter colorum varietatem, qui arte naturam informante incurrunt plerisq; locis, tam aposite quo trahit eos ingenium artificis, vt ascititi potius quã innati videantur. natura etiam ipsa in his colorum varietatibus disseminandis, ita interdum ludente, vt picturam vicissim æmulari videatur. vt in gemma illa Pyrrhi, in qua nouem musæ, & Apollo citharam tenens spectabantur, non arte, sed sponte ita discurrentibus maculis, vt musis quoque singulis sua redderentur insignia. Sunt etiam interdum in achate variæ zonæ transitu colorum mirabiles: ex quibus aliæ, atque aliæ superficies cælatae dant varios colores. Gemmis scalptis annulis inclusis veteres signabant, vt Augustus Sphynge. Postea imagine Alexandri magni. Augusti vero imagine principes post eum signarunt, Mecenases rana, Sylla Iugurte traditione, Pōpeius triumphis. Magi vero scalpturas quasdam reconditoris, vt aiunt, sapientie ostentant. Alij vero ad oblectationem tantum huiusmodi gemmas in dactylotheis etiam nuncasserunt. Adamas suis opibus tantum commendari voluit; non arte, non figura ylla ascititia, hac quoque parte indomitus. Hodie talis futurus, nisi artificum solertia in adamantem ipsum adamantem exauiisset. quo inueto indomita illa nature vis, ferri & ignis contemptrix suis viribus excisa est. Itaque artificum manibus tandem

tandem parere didicit, adeo nihil labor improbus pervincere non potest. Olim innotuerat alio adamante perforari posse: hoc leui vulnere cognitum est posse etiam domari. Omnium qui olim cælarunt, scalpseruntque probatissimus habitus est Pyrgoteles, Alexandri magni iudicio, qui vetuit ab alio se in gemma scalpi quam à Pyrgotele: quo præiudicio primam laudem apud posteros omnium suffragijs adeptus est. Proximi à Pyrgotele fuere Apollonides, & Cromius. Vdimus Amethyſtum vnciali magnitudine, Apollonidis manu scalptam: in ea effigiem Dianæ, opus adeo partibus omnibus absolutum, vt nihil supra. Artificis nomen adscriptum est, tam exilibus literis, vt fere visum effugiant. Est ea gēma Horatij Tigrini, insignis & ingenio, & animi cādore viri. Famam etiā habuit Dioscorides, qui Diui Augusti imaginem expressit, qua postea principes signabant. Similem si nō eandē cælaturā habet Heroardus medicus regius, naturæ pariter, & artis bonis existimator. Vidi etiam Mercurium eiusdem Dioscoridis manu exscalptum ex sarda gemma, cui artificis nomen adscriptum est. Eius mihi copiam fecit idē qui & Dianæ illius Apollonidis. Postea cœpit ars in peius ruerē, nec quisquam exinde repertus est qui priscos illos emulatus sit.

ILLVSTRISSIMO ET EXCELLENTISSIMO D.

ANNAE, DVCI DE GIOIOSA,
FRANCIAE PARI, ET
AMIRALIO.



E sculptura, & pictura germanis artibus scripsi Romæ, id est in harum artium celeberrimo gymnasio. non vt artem docerem, quam nemo vnquam tam bene verbis illustrauerit, atque recentiores isti penicillo. quorum manus cum veterum solertia certare indicauerit, qui Michaelis Angeli, Raphaelis, & aliorum opera contulerit, cum ijs quæ Plinius de veterum illorum arte prodidit. Tametsi quædam in ea lateret præstantia, quam nemo vnquam scribendo potuit exprimere, Apelles vno verbo Venerẽ appellabat, quæ vna præstabat cæteris pictoribus. Alià ne fuerit ab ea, quam Raphael ille Urbinas, & alij nonnulli huius seculi clari pictores sua arte complexi sunt, nihil ausim asserere. horũ extant opera illorum leguntur. et leguntur plerisque locis corruptè. Quocirca vt iusta comparatio fieri posset & temporum, & artificum, visum est antiquæ artis lineamenta, quæ extant apud eum autorem iam pene fugientia, re-

* restituere


stituere: labes, quas quibusdam locis temporum iniuria
asperferat, hac veluti sponsia detergere: ac denique
hanc tabulam instar tot nobilium operum, quæ iamdu-
dum tempus absumpsit; obseruantia, & obsequij erga
te mei tibi monimentum dicare.

Amplitudini vestra

Deditisixas ser.

Lud. Demontiosius.

PICTURA,



DE PICTURA arte illa nobili dicendum est, quæ tam felici successu poësim æmula-
ra est, vt pariter oculos atque illa aures te-
nuerit. affectus vtraque mouens, vtraque
parem semper sibi licentiam arrogans. Hu-
ius artis initia sunt incerta. Aegyptij sex mil-
libus annorum antiquiorem faciunt quam Græci, vana anti-
quitatis iactatione. Græci alij Sicyone, alij apud Corinthios
primum inuentam fuisse prædicant. rudibus primum initijs:
nempe vmbra hominis lineis in parietibus circumscripta. vn-
de prima lineamenta ducere, vno verbo adumbrare dicim⁹.
Huius inuentionem adscribunt alij Philocli Aegypto; alij
Cleanthi Corinthio. Sed primi teste Plinio exercuere Aridi-
ces Corinthius, & Thelephanes Sicyonius, sine vlllo colore.
iam tamen spargentes lineas intus, quæ magis admonerent
quam ostenderent. Ideo & quos pingerent adscribebant.
Cleophanes Corinthius primus inuenit eis colorem addere
testa trita. & iam tum pictura in duo genera discreta est, in li-
nearem videlicet, & coloratam. Sed linearis vacua est, aut ple-
na. Vacua, quæ extremis tantum lineis constat. Huius sunt di-
spositio, & symmetria, & tertia, quæ nomen latinum non ha-
bet, optice, quam Plinius mensurarum nomine significauit.
Dispositio est partium singularum situs, & recta collocatio.
Symmetria commensus partium sibi inuicem. Optice earun-
dem pro varietate situs, & posituræ, dissimilis & inæqualis de-
lineatio. De dispositione & mensuris Plin. cap. x. lib. xxxv.
vbi de Apelle sic scribit. fuit autem non minoris simplicita-
tis, quàm artis. nam cedebat Amphioni de dispositione, As-
clepiodoro de mensuris, hoc est quantum quid à quo dista-
ret. Sed adduci non possum vt credam autorem ita scripsisse;

A

qui-

quinimo quædam hic transposita esse, aut ei falso adscripta. Nam quantum quid à quo distaret ad partem illam graphices quâ Plinius proprio nomine distinguens à ceteris dispositione appellat, referendū non est. Exempligratia, in architectura dispositio linearis ostēdit quo quidque loco ponendum sit, quantū item quid à quo distare debeat. vt quo interuallo colūne sint collocandę, quo item reliqua. Deinde ad symmetriā omnia sunt exigenda. hæc pro quantitate ædificij ostēdit partitū singularū cōmensum. Demum totius ædificij mensurę ad opticeu reuocandę sunt. nec iam vna mensura est, sed infinitæ in vnum punctū coeuntes, à quo totius optices ratio pendet. Hęc ita habere ex Plinio ostendo, cum trium harum partium graphices diuersis locis meminerit. Quod si mensuras à dispositione seiungamus, nec curet amplius dispositio quantū quid à quo distare debeat, siscitari velim quæ sint dispositionis partes? Nam si ædificiū aliquod delineandum sit, occurrit primum illud, quantum singulæ partes inuicem distare debeant. Si quis figuram hominis instituat, eadem cura sollicitat aggredientem. Tribuamus hoc mensuris, quid tandem dispositioni supererit? Mensura nomen generis est, & dispositioni, & symmetriæ pariter inseruiens. Sed quatenus specie distincta constituit, ex proprijs mensuris constat, coeuntibus lineis in punctū. Et sane si mēsuras in genere intelligamus, eas geometria sibi vindicabit: nec est cur architectura eas sibi arroget. Sed quid diutius hic moror? disponere quid aliud est quā suis locis singula statuere? Symmetrię propriū est partitū mensuras psequi. Sed cū optice latinū non haberet, mensuras Plinius pro ea vsurpauit. Cū igitur locus sic haberet, nō cedebat Amphioni de dispositione, hoc est quantū quid à quo distaret, Asclepiodoro de mensuris, quidam qui hęc non nouerat, hanc interpretationem ad mēsuras referendam esse duxit, existimans appositius mensuris, quam dispositioni conuenire. Quocirca vt membrum luxatum in suos artus redeat, locum ita legemus. Non cedebat Amphioni de dispositione, hoc est quantum quid à quo distaret, Asclepiodoro

doro demensuris, &c. Symmetria altera graphices pars est, quæ summam venustatem operi conciliat. De hac non semper cōuenit inter artifices. Quippe cum natura in symmetria corporū nō sibi semper cōstet, querendū fuit, quēnā ex oībus maxime probāda esset. Neque enim cuiusque iudicio standū fuit. Vulgus enim quod rectū est probat, sed nō desiderat exquisitā illā pulchritudinē, cuius vnus amore flagrat peritus artifex. Itaque vel si nusquā reperiatur, eā sibi nihilominus ob oculos proponit, & eius speciē amat, tum eius pulchritudinis partes inuicē cōponit, vt solēt virgines hinc inde lectis floribus coronānectere. Sic olim Zeuxis Agrigentinis facturus tabulā virgines earū nudas inspexit, & ex eis quinque elegit, vt quod in singulis laudatissimum esset pictura redderet. Hāc pulchritudinē Lysippi iudicio nemo vnquā satis accurate expressit. Aliquādo enim interrogat⁹ quē sequeretur anteceditū, dixisse fertur demonstrata hominū multitudine, ipsam naturā imitendā esse, nō artificē. Nec tamen naturam in vno laudauit, sed speciē quandam pulchritudinis, quæ ex vniuersa multitudine colligi posset. Quocirca dicere solebat, ab alijs homines factos quales essent, à se quales viderentur. Apelles sibi diffidens admoneri volebat, proponebat enim in pergula opera absoluta, ipse latens ausculrabat, si qua forte vulgus improbaret. Symmetriā prim⁹ in pictura seruasse fertur Parrasius. Tertia graphices pars est optice. Plinius inopia Latini sermonis ei nomen nō tribuit, sed quæ sint eius partes satis explicat, vbi de Parrasio cap. x. lib. xxxv. Cōfessione inquit artificū in lineis extremis palmā adeptus est. Hæc est in pictura sūma subtilitas, corpora enim pingere, & media rerū, est quidē magni operis, sed in quo multi gloriā tulerint: extrema corporum facere, & desinentis picturæ modū includere, rarū in successu artis inuenitur. Ambire enim debet se extremitas ipsa, & sic desinere vt promittat alia post se, ostendatq; etiā quæ occultat. His verbis Plinius opticen descripsit; tamen si locum non prorsus bene habere suspicor. nam verba illa extrema corporum facere, & desinentis picturæ modum

includere, rarum in successu artis inuenitur, sic malim legere,
 extrema corporum facere, & desinentis picture modo illudere,
 rarum in successu artis inuenitur. Nam desinentis picture
 modum includere quid sit nescio, sed desinentis picture mo-
 do spectantibus illudere hoc artis est. Hoc ut præstet artifex
 primum obseruare debet, quantum quid à quo distet, totius
 operis in plano configuratione. Obscuris deinde lineis sursū
 ad perpendicularum erectis ad propositi puncti mensuram eas
 omnes exigere: habita in primis ratione quantum quælibet à
 puncto distet. Vnde patet in hac graphices parte præcipuum
 esse vsum mensurarum, siue prima operis in plano configu-
 ratio spectetur, siue operis adumbrata species (illam Ignogra-
 phiam Græci dicunt, hanc sciographiam, Hermolaus barba-
 rus scenographiam.) vel si opus sit recedentes operis partes
 extremis lineis terminare. in quo prima laus est quantum ad
 integrum corporis ambitum deest, id sensim, ita oculis sub-
 ducere, ut desinentis picture modo, ars spectantibus illudat.
 Artifici dictum sat est de graphice nobilissima picture parte.
 In qua nescio an quicquam vtilius iuuentuti proponi possit
 quo erudiatur. & Græci in hac sententia fuerunt. Quocirca
 inquit Plinius, accedente Pamphili egregij pictoris autorita-
 te effectum Sycione primum, deinde etiam in tota Græcia, ut
 ingenui pueri ante omnia graphicen, hoc est picturam in bu-
 xo docerentur, reciperetur quæ ea ars in primum gradum li-
 beralium. Semper quidem honos ei fuit, ut ingenui eam exer-
 cerent, mox ut honesti, perpetuo interdicto ne seruitia doce-
 rentur. Hæc sunt verba Plinij, cuiusdam imperiti glossemate
 interpolato, qui graphicen picturam interpretatus est, speciē
 pro genere accipiens. Quocirca hanc interpretationem, ut
 Plinio indignam reijcimus. Graphice plena sit lineis intra fi-
 guram descriptis. Primi omnium Aridices Corinthius, & Te-
 lephanes Sicyonius lineas intus sparserunt. Ars deinde ex-
 culta fuit, nostris quidem temporibus vsque adeo, ut pictu-
 ræ coloratæ effectus in exprimendis vmbreis, & luminibus æ-
 muletur. Ostendit enim contracta, & proiecta, caua & intum-
 mescen-

mescentia, & quicquid denique colores præstare possunt, id ipsum præstat graphice.

Nunc de pictura colorata videndum est. Huius tria genera constitui possunt. vnicolor, bicolor, tricolor. Primi generis autor fuisse perhibetur Cleophanes Corinthius, qui primus inuenit figuræ testa trita colorare, quæ prima artis incunabula fuerunt. Qui deinde sequuti sunt cinnabari pinxerunt, & ephesio minio, quod derelictum est, quia curatio magni operis erat, & quia nimis acre, vt ait Plinius. Ideoque trāsire ad rubricam, & sinopidem. Spargebatur autem intus lineæ, in quibus præcipua laus erat. Sed ex pluribus etiam coloribus seorsum positis monochromata pinguntur. quo genere picturæ pinguntur etiam nunc folia lusoria varijs coloribus, idque membranis fenestratis. Nihil enim interest siue vnus, siue plures colores adhibeantur, modo sint distincti, & puri. Nam hoc picture genus inter monochromata censendum esse, Plinij verba ostendunt quæ sunt cap. x j. lib. xxxv. Pingunt inquit, & vestes in Aegypto, inter pauca mirabili genere. Candida vela postquam attrituere illinentes, non coloribus, sed colorem sortentibus medicamentis. Hoc cum fecere non apparet in velis, sed in cortinam pigmenti feruentis mersa post momentum extrahuntur picta. Mirumque cum sit vnus in cortina color, ex illo alius, atque alius sit in veste, accipientis medicamenti qualitate mutatus. Hoc cum Plinius inter picture genera recenset, certum est ad monochromata referendum, cum ex singulis coloribus constet. ad bicolorum enim, aut tricolorum non potest. Puris etiam coloribus pingunt occidentales Indi, cuiusmodi liber vnus extat in bibliotheca Vaticana.

Pictura bicolor effecit umbrarum adiectione, vt corpora in tumescere viderentur, & quasi solidescere. Huius nusquam memini Plinium mentionem facere. à monochromate enim trāsit ad picturam numeris omnibus absolutam. Cum tamen nostris temporibus multa sint huius operis exempla, in quibus nullo adiecto lumine, nihil ad graphicen præter umbram accedit, & habet tamen pictura venustatem. Hoc fere genere
pictores

pietores vultus primū in charta imitātur, quo deinde exēplo opus accurate perficiūt. Bicolorē hāc picturā eo dico qđ ad monochromata referri nō possit, cū huic prāter colorē extensū in tabula, accedat ymbra, color alius ā subiecto. Sed nec ad tricolorē picturā referri pōt, qā ī hac vt dicem⁹, lumen ab ymbra tono discernitur. Quocirca tertiā speciē necesse fuit cōstituere, mediā inter monochromata, & picturā tricolorē.

Tandē, inquit Plinius, sears ipsa distinxit, & inuenit lumen atque ymbra, differentia colorū alterna vice sese excitante. Tricolorē hic picturā ostendit. Est enim hic color extensus in tabula instar subiecti, medius inter ymbra & lumen, sensim ad vtrūque porrectus. Hęc tria corpus plēnū, & solidum faciunt. Sed in sociandis coloribus adhibenda est cura circa transitus colorum, vt molliter coeant indiscretis commissuris. Huc pertinet illud nobile certamen inter Apellem, & Protogenem valde celebratū. Tamen si pauci admodū intelligant de quo inter nobiles illos artifices certatum fuerit. Quod certamen sic ā Plinio describitur, vt illis tēporibus vulgatissimū. Scitum est inquit, inter Protogenem, & eum (de Apelle loquitur) quid accidit. Ille Rhodi viuebat. quō cum Apelles ad nauigasset audius cognoscendi opera eius fama tantum sibi cogniti, continuo officinam petijt. Aberat ipse sed tabulam magnæ amplitudinis in machina aptatam picturæ anus vna custodiebat. Hęc Protogenem foris esse respondit, interrogauitq; ā quo quæsitum diceret. Ab hoc, inquit Apelles, abreptoq; penicillo lineam ex colore duxit summæ tenuitatis per tabulā. Reuerso Protogeni quę gesta erant anus indicauit. Ferunt artificem protinus contemplatum subtilitatem dixisse Apellem venisse. nō enim cadere in alium tam absolutum opus. Ipsum tunc alio colore tenuiorem lineam in ipsa illa duxisse, præcepisseq; abeuntem, si redisset ille, ostenderet, adjiceretq; hunc esse quem quæreret. atque ita euenit. Reuertitur enim Apelles, sed vinci erubescens tertio colore lineas secuit nullum relinquens subtilitati locum. At Protogenes victum se confessus in portum deuolauit hospitem

tem quærens. Placuitq; sic eam tabulam posteris tradi, omnium quidem; sed artificum præcepto miraculo. Addit Plin. Consumptam eam constat priore incendio domus Cæsaris, in palatio auide ante à nobis spectatam, spatiofiore amplitudine nihil aliud cōtinentem, quam lineas visum efugientes, inter egregia multorum opera inani similem, & eo ipso allicientem, omniq; opere nobiliorem. Recte Plinius si audita tantum retulisset. Sed cum addat, antequam incendio consumpta esset tabula, eam se auide cōtemplasse, spatiofiore amplitudine nihil aliud continentem quam lineas visum effugientes, pace tanti viri dixerim, si totus Argus fuisset, si totus Lynceus, lineas videre non potuisset quæ nusquam erāt. Vir in cæteris diligentissimus hallucinatus est vulgi præiudicio. Cum enim fama esset de lineis institutā disputationem inter nobiles illos artifices, & opus adhuc extare in ea tabula, eas videre visus est: alioqui se parum perspicacem crediturus. Sed qui de lineis initum fuisse certamen à claris illis artificibus dixerant, id aliorum intelligebant, atque isti acceperint. Certum est enim in pictura colorata nullum esse prorsus linearum vsum. Imò vitio dari si lineæ appareant. Extremæ enim lineæ, qua parte vmbra desinit ei prorsus adherent, & cum ea confunduntur. Quæ verò intus sparguntur, ne ipsæ quidem ab vmbra separantur. Sed nec qua lumen pictura recipit lineas vllas cernere est. Quod si ad graphicem spectemus, ne hic quidem video cur hæc subtilitas linearum tantopere commendetur in pictore: cum artificum iudicio pictura linearis eo nomine nunquam laudetur, sed id tantum spectetur, an graphice rerum effigies sint adumbrate. Nec interest tenuioribus lineis an crassioribus. Imo de industria lineamenta crassioribus primum lineis adūbrantur. Vidi enim multa autographa peritissimorum artificum, qui hoc scelicissimo sæculo floruerunt. Michaelis angeli Bonaroti, Raphaelis vrbinate, saluiati, Polidori, Parmēsis, Titiani, aliorūq; nobilium artificum, sed neminem animaduerti affectasse viquam subtilitatem illam linearum. Itaque videndum est quod

quod huius celebris certaminis subiectū fuerit, & quod tantum artis specimen, vt eo viso manus fama tantum cognita subito dignoscerentur. Sed lectorem picturae quadantenus peritum opto, aut qui saltem doceri velit. huic ego rem vt est paucis exponam. Primum nosse opere pretium est in pictura absoluta colores singulos tribus differentijs tanquam gradibus distingui. Luce, vmbra, & splendore. Sine luce nihil omnino cerni potest. Hęc quaquauerſus corpus solidum opacū feriat, vmbra in parte opposita circumscribit. Inter lucem & vmbra splendor spectatur. in lumine color dilutus est, in vmbra saturatus. in splendore coloris species cernitur; in maiori luce non discernitur, nec item in vmbra intensa, sed opus est lumine moderato. In luce enim intentissima color omnis candidus apparet. Quocirca in transfiguratione Christi omnia apparebant spectantibus Apostolis cādida, propter lucis intentionem. Contra si lux remissior sit, ne tunc quidem discernitur colos. Quo fit vt ad ignis, aut lunæ splendorem rubens color fuluus videatur, viridis ceruleus. Si vero vmbra intensior sit, omnia nigra videbuntur: adeò nisi moderato lumine species discerni nequit. Hęc Plinius optime exposuit in illo cap. v. lib. xxxv. Tandem inquit se ars ipsa distinxit, & inuenit lumen, atque vmbra, differentia colorum alterna vice sese excitante. Deinde adiectus est splendor, alius hic quā lumen, quem quia inter hoc, & vmbra esset, appellauerunt tonum. commissuras vero colorum & trāsitus, armogen, hęc Plinius. Cleonides autor est tonū quatuor significare. pthongum, interuallum, locum vocis, & eiusdem tenorem. Et hodie etiam musici indifferenter pro his quatuor vsurpāt. Quomodo accipiamus recte veteres splendorem appellaauerunt tonum. est enim splendor in pictura idem quod pthongus in musica. & quemadmodum in musica proxima vocum solida interualla per tonos progrediuntur, sic per hos etiam tonos colorum species. Præterea vt in musica locus vocis dicitur tonus, sic in pictura vbi coloris species refulget tonum dicemus. Denique etiam tenorem vtrobique recte appellabimus

bimus vbi vox inter acutum, & graue sustinetur. & vbi color
 pariter inter lucem & vmbra subsistet. Caterum in musica
 tonus à tono semitonio distinguitur. in pictura color à colo-
 re armoge. Semitonium est transitus, & tanquam commissu-
 ra vocum. & item armoge transitus & commissura colorum.
 Armoge igitur in pictura instar semitonij est. Adde, quemad-
 modum tonus in musica in æquales partes diuidi nō potest,
 sic nec coloris splendorem ab extremis equali interstitio di-
 stare; sed vmbra aliquanto latius excurrere instar semito-
 nij maioris: vt in corpore spherico optica ratione demonstrari
 solet. Hæc cum Plinius optime nouisset, miror eum non
 intellexisse qua de re institutum fuisset certamen inter no-
 biles illos artifices, tametsi tabulam vidisset. Nam in lineis ex-
 primendis certasse falsum ostendimus. cum & Plinius dicat
 penicilli opus fuisse. Atqui penicilli vsus nullus est in graphi-
 ce. De sectione igitur lineæ contenderunt. hoc est de scissura
 & transitu colorum: de commissura illa quam Plinius Har-
 mogen appellat. Enimuero digna res est in qua pictor excel-
 lere studeat; nō in lineæ ductu, quam si quis paulo subtiliorẽ
 pingere studeat, ne Apelles quidem ipse semel diuidere pos-
 sit. In armoge verò, vt colorum, sic artis & artificis splendor
 elucet. Vt enim musicum eum laudabimus, qui recte mo-
 dulabitur distinctis interuallis, sic pictor qui colorū gradus
 pulchre distinxerit, & transitus eorum notauerit, ille quod
 summum est in arte assequutus erit. Cum igitur Apelles ab-
 repto penicillo ex artis sui specimine à Protogene agnosci
 vellet, non figuram expressit; sed armogen in colore notauit.
 Protogenes artem agnouit; sed artificis negligētiam notauit
 alio subinde colore interiecto transitū, qui duriusculus erat
 molliens. Aemulatio arti lenocinata est. erubescens enim A-
 pelles vinci, commissuram ipsam secuit alio interiecto colo-
 re, adeo tenui, vt nihil supra. Ita de Systemate picturæ diui-
 dendo certarunt summi artifices. digna certe cura in quam
 toto pectore incumberent. Plinius igitur in his parum exer-
 citatus, cum tabulam auide contempleretur, videre visus est

lineas, tametsi visum effugientes fateatur, quia scilicet nullæ prorsus erant.

Ex his apparet colores singulos in pictura absoluta tribus gradibus distingui, tono, luce, & vmbra: quorum bini armoge sociantur. Idcirco hanc tricolorem picturam dixi. Sed Plinius duo picturæ genera tantum agnoscit, monochroma, & varium. Illi monochroma est, cum vnus tantum color tabulæ inducitur, vmbra tamen, & lux suis locis sparguntur. Quo picturæ genere claruit hoc sæculo in Italia Polidorus, cuius extant multa præclara opera Romæ, fecundi admodum ingenij partus. Vidi etiã miniaturã eiusdẽ generis, tam accurate perfectam vt in trãsitu colorũ nihil desiderari posset. Idcirco hoc picturæ genus ad tricolorem picturã retuli. Bicolorem enim picturam dixi, cui ad colorem extensum in tabula nihil præter vmbra accederet. Vnicolorem vero, in qua colores singuli puri seorsum ponuntur. Itaque cum tria sint nobis picturæ genera vnicolor, bicolor, tricolor, Plinius de tricolore tantum agit, cuius duæ sunt illi species, monochroma, & varium. cui nomen non tribuit.

Idem Plinius nobis autor est veteres quatuor coloribus dumtaxat pinxisse. ex albis melino, ex silaceis attico, ex rubris finiopide pontica, ex nigris atramento. Sed silaceus ille cuius modi fuerit nemo satis explicauit. Philander purpureum, & luteum in vltimo interpretatur. Sed tamen neutrum hoc loco significare potest: cum ex quatuor illis coloribus quibus veteres illa nobilia opera factitarunt vnum oporteat esse cæruleum. Certum est enim in pictura minimum opus esse his quatuor coloribus, albo, nigro, rubro, & ceruleo. Quorum mixtura cæteri omnes componuntur. ex albo & nigro cineraceus, ex rubro & nigro fuluus, ex rubro & cæruleo viridis, ex hoc & rubro, luteus, ex albo & ceruleo cæsius, & ex his rursus alij innumeri. Huius fecunditatis causa est, quod ex quatuor illis primigenijs bini quam longissime distent. Album scilicet à nigro, rubrũ à ceruleo. quo fit vt inter medios oēs sua facultate cõprehendant, nec extra cadere possit color vllus. Nouimus

mus quidē ex file fieri colorē luteū, & purpureū, sed cū Attici adiectione colorē cēruleū semper significat: cuius penuria factitio vtebātur, maxime ad tēctoria opera. Quomodo autē fieret, docet Vitruuius cap. xiiij. lib. vij. Tēctores inquit cum volūt fil atticū imitari, violā aridā conijciētes in vas cū aqua cōferuefacere faciūt ad ignē, deinde cū est tēperatum conijciunt in linteū, & inde manibus exprimentes recipiūt in mortariū aquā ex violis coloratā, & ex ea, eretriā infundentes, & eā terentes, efficiūt filis atticī colorē. Sed inquit Philāder, Plinius lib. xxxij. cap. vlt. non filis, sed cērulei eā fraudē refert. Locus Plinij quē citat sic habet. Cērulei synceri experimentū in carbone vt flagret. Fraus viola arida decocta in aqua, succoq; per linteū expresso in eretriā. Sed Vitruuius docet eā esse fraudē filis atticī. Itaque filis atticī & cērulei eadē ratio. Sed fil limus est, cēruleū arena, vtriusque color idē. Porro cum hi duo autores dicant idē, & alter alterū explicet, Philander eos tanquā par gladiatorū inuicē cōmittit. Nec interim animaduertit, hac interpretatione cēruleū extra picturē septa arceri, vnū videlicet ex quatuor picturæ elemētis. Sed homini parū in pictura versato, tametsi alias erudito, fas fuit hac ignorare, nisi pollicitus esset ex professo se de coloribus scripturū. Ceterū Plinius, qua est diligētia, cū de coloribus sermonē instituit, pretia eorū, vt tunc erāt posteris tadere voluit. Sed numeri corrupti sunt notarū similitudine. Prīmū vbi de file sic scribit cap. xij. lib. xxxij. Sil inquit proprie limus est. Optimū ex eo quod atticū vocatur, pretium in libras xxxij. Budæus existimat, vbi numi gen^o nō exprimitur sestertiū numū intelligēdū esse. Itaque hic sestertios xxxij. legendū putat. Ego vero existimo ex tribus notis denarij, primā denariū numū significare, vt & aliās sepe. quanquā interdū linea trāsuersa decussim scinderet. Sed de his fufius cū de notis numerorum scriberem, quæ aliquando lectori impertiemus, cū in eum vsū conuicta sint à nobis. Hunc igitur locum Plinij ita legemus cū distinctione numi, pretium in lib. x. xxij. hoc est sine contractione, pretium in libras denarij duo & viginti. Eodē capite,

ex ceruleo fit quod lomentum vocatur. Perficitur lauando, terendove, & hoc est ceruleo candidius. Prætium eius xxij. cerulei xvij. Notarij lapsus etiam hic ita restituendus est. denarij xij. cerulei denarij octo. Quod item sequitur, nuper accessit & Nestorianum ab autore appellatum. Fit ex Aegyptij leuissima parte. prætium eius xl. in lib. lego denarij l. in lib. Paulo post. Nō pridem apportari & indicum est cœptum, cuius prætium xvij. in libras. lego denarij septem in libras. Ita legendum esse ex Plinio ostendo: cum sinopidi prætium statuatur in libras denarios tredecim expresso genere numi, cap. vj. lib. xxxv. Si enim sinopis rubricę genus tredecim denarijs æstimabatur, quomodo sil & ceruleum non pluribus fere sestertijs venderetur? Præterea solet Plinius si denariorum numerus rotundetur, per denarios prætium exprimere, potius quam per sestertios. vt in eo loco quem proxime ascripsi de sinopide. Igitur in proximo exemplo denarios octo potius dixisset, quàm xxxij. sestertios. Adde, cum cerulei prætium xxij. in libras æstimarit, quomodo vno tantum sestertio pretium abfuerit à sex denarijs? cur summa rotundata non est? non enim solent prætia rerum constitui ita precise, vt numi sestertij ratio habeatur in maiuscula summa. Est & aliud inquit genus lomenti, quidam tritum vocant quinis assibus estimatum. Hic quoque non satis emendate legitur quinis assibus, pro quinque denarijs. Sed hæc vt iam pollicitus sum, latius alias explicabuntur. Quod vero sequitur eodem loco, postquam indici prætium ostendit. Ratio in pictura ad incisuras, hoc est umbras ab lumine diuidēdas. Hæc etiam lectio parua adiectione quantum mutata est à prima? Hæc enim, ab lumine, non sunt auctoris, sed cuiusdam qui nesciebat quid esset umbram ab lumine diuidere. Itaque putauit autorem incisuram hic posuisse pro tono. proinde addidit de suo, ab lumine: infelici sane successu. nam hac additione lumine huic loco tenebras offudit. Tonus vt dixi, umbrā diuidit ab lumine: scissura aliud est quam tonus. Non enim diuidit umbram ab lumine, sed umbram ipsam, & hoc est proprie scindere, illud

Iud diuidere. Sit exempli gratia figura oris exprimenda. ducetur primum linea, quæ labium superius ab inferiore diuidat. deinde ab eminentiore parte labiorum incipiendo, ad anteriorem partem vmbra intendetur, vt vtriusque labij intensior vmbra definat in lineam illam, quæ diuidit labium superius ab inferiore, & vmbra ab vmbra, non vmbra à lumine, vt falso existimauit ille, si dijs placet, paraphrastes Plinij. Pro coloribus etiam veteres interdum res coloratas vsurparunt: vt in opere vermiculato, cuius primum vsus fuit in pauimentis lithostratis. His primus famam dedit qui autore Plinio Pergami strauit quem vocant asaroton ocon. Quoniam purgamenta cæne, quæq; euerri solent veluti relicta, fecerat paruis ex testulis tinctis in varios colores. Vt autem noscatur quam elegans fuerit hoc genus picturæ, addit eodẽ loco. mirabilis ibi columba bibēs, & aquam vmbra capitis infuscans. Apricantur aliæ scabentes sese in canthari labro. Ex humo inquit pauimenta in cameras transiere, & e vitro fieri coeperunt. Claudij temporibus inuentum est interraso marmore, vermiculatisque ad effigies rerum, & animalium crustis pingere innatis marmori coloribus. Huc pertinet querimonia illa auctoris, luxum, & delitias exprobrantis suo sæculo. Non placent inquit iam abaci, nec spatia montis in cubiculo delictescentia, cœpimus & lapidem pingere. Sed & huius loci sententiam vnius literæ adiectio mutauit, cum lapidem perperam, pro lapide legatur. Non enim hic de lapidum pictura loquitur; sed de pictura quæ fiebat lapideis tessellis. Lapidem vero pingere Neronis temporibus inuentum fuit, & maculas quæ non essent in crustis inferendo, vnitatem variare: vt ouatus esset Numidicus, vt purpura distinguere-tur Sinnadicus, qualiter illos nasci optarent dilitiæ.

FUIT & alia pingendi ratio, quæ encausticen appellabant, quod pictura inureretur. Idque duobus modis, cera, & ebore cestro, idest viriculo. Hodie vtraq; ratio ignoratur. Si tamen est coniecturæ locus, ego priore illo encausti genere hac ratio-

ratione picturam inuistam fuisse crediderim. Ceram primum induratum medicamentis. ex ea deinde factas fuisse tabulas, in quibus formæ eorum quæ pingenda essent incidebantur. Tum, quæadmodum in vermiculato opere, in eas formas cauas ceris inditis varij colores figuris inducebantur, nullis apparētibus cōmissuris. Hoc in eo genere præstantissimum erat, quod ceræ pictæ carnis similitudinem felicias æmulerentur, quam si dilutis coloribus pictæ fuissent. In ebore vero cestro, idest viriculo, pingebant. Cestrū pollux styli genus interpretatur. vnde conijcio ita veteres ebore picturam inuisse, vt quod pingēdum esset graphice primum in ebore adumbrarent. Deinde seruata ratione luminum, & vmbrarum, ebore candore ad lumina vterentur. tonum verò, & vmbram pictis ceris exprimerent. Huic generi picturæ ea erat gratia, quod cum in ceris nitor quidam splendeat, ad lumina splendidiore colore opus fuit, qualis in ebore candore cernitur. Ea fuit igitur optima colorandi ratio, vt colorem umbra paulo dilutius condirent, à tono vero ad intensissimum colorem progrediendo picturæ lumen darent ex ipso ebore. Omnibus enim coloribus bene est cum albo, nitentibus vero optime cum candore. Hic candor maxime in picturis muliebribus laudabatur. Nam & anulare candidum erat, quo muliebres picturæ illuminabantur. Id fiebat ex creta, admixtis vitreis gemmis ex vulgi annulis, vnde & anulare dictum fuisse autor est Plinius. Itaque & hoc encausti genere veteres utebantur ad pingendas mulierum effigies. Lala Cizenica cum & penicillo pingeret, pinxit & cestro in ebore, imagines mulierum maxime. Inde conijcio eum fuisse vsum ebore in encaustice. Imo ita fuisse qualibet sponsione libens asseruerim. Tertium encausti genus accessit, resolutis igni ceris penicillo. quod picturæ genus in nauibus nec sole, nec sale, ventisue corrumpebatur. Ideo non tantum classibus familiare fuit, sed & nauibus onerarijs. De encaustices autoribus verba Plinij apponā. Ceris inquit pingere, ac picturam inurere quis primus excogitauerit nō constat.

stat. Quidam Aristidis inuentum putant: postea consumatū à Praxitele. Sed aliquanto vetustiores encausticæ picturæ extitere, vt Polygnoti, & Nicautoris, & Archesilai pariorum. Lysippus quoque Aeginæ picturæ suæ inscripsit, encausen. quod profecto non fecisset nisi encaustica inuenta iam tum fuissent. Pamphilus quoque Apellis præceptor, non pinxisse tantum encausta, sed etiam docuisse traditur. Pausiam vero Sicyoniorum primum in hoc genere nobilem. hæc tunc de Encaustice.

Nunc videndum est qui pingendo famā olim adepti sint, & quid vnusquisque eorum ad artem exornandam contulerit. Tuum est Plinij recēdere, qui magnam eorum partem ab interitu vindicasti: quique eorum opera interciderere non es passus. Fecerat hoc Varro pari diligentia, atque pietate, septingentorum artificum nominibus, figuris etiam aliquo modo expressis. Sed duræ temporū vices hoc illi meritū, artificibus famā, nobis vero memoriā eorum inuiderunt. Atticus etiam idipsum præstiterat. Quando igitur eorū scriptis frui datū nō est, eos tantum ex Plinio percurram, qui suis inuentis artem excoluerūt. Non vos igitur silendi estis Aridices, & Telephanes, qui primi testa trita colorare cœpistis, & lineas quasdam intus spargere, politiores haud dubie futuri, si in meliora tempora incidissetis. Sequutus est deinde Eumarus, qui prim⁹ in pictura marem à fæmina discreuit. Huius deinde inuenta excoluit Cimon Cleoneus, qui catagrapha inuenit, hoc est obli quas imagines, & varie formare vultus, respiciētes, suspicientes, & despicientes. Articulis etiam membra distinxit, venas protulit, præterq; in veste & rugas, & sinus expressit. His successit Polygnotus, qui primus mulieres lucida veste pinxit, capita earum mitris versicoloribus operuit, plurimumq; picturæ primus contulit. Siquidem instituit os adaperire, & vultum ab antiquo rigore variare de eodem Plin. cap. xix. lib. xxxv. Huius est inquit tabula in porticu Pōpeij, quæ ante curiam eius fuerat, in qua dubitatur ascendentem cum Clypeo pinxerit an descēdentem. Hic locus obscurior paulo est, ne forte

forte difficilius fuit in ea tabula iudicare, ascendente cum clypeo Polygnotus pinxisset, an descendente, quàm hic conijcere quid voluerit autor his verbis significare. Cum appareat, voluisse eum reconditum quoddam artificium notare. & certe ita est. Hac enim descriptione videre videor figuram ita positam, vt accedenti, & retrocedenti alia, atque alia videretur. Omnes figuræ ita positæ sunt vt radijs rectis aspiciendæ sint, aut obliquis. Rectis è regione tabulæ. Obliquis vero aut ex eodem plano, sed à latere, aut ex diuerso plano, inferiore, vel superiore. Si de loco inferiore figura suspicienda sit accedenti ad tabulam figura descendere videbitur, recedenti ascendere. Contra si de loco superiore despici velit, quo longius à tabula recedet oculus, figura descendere videbitur, quo propius accedet descendere. & ratio optices ita cogit fieri. Polygnotus igitur in pictura solers nouam rationem excogitauit, qua illuderet spectatori. Figuram enim ea arte pinxit vt pars superior, tãquam de superiore loco videretur, inferior ex inferiore, yna & eadem figuræ positura diuersa eiusdem artis exempla complexus. Vt si in partem superiorem oculus intenderetur, recedendo figura descẽdere videretur. contra ascendere, si in inferiorem partem intueretur. Hoc puto voluisse Plinium laudare in Polygnoto, quem nihilominus primis picturæ temporibus inclulit: cum nõdum lumina artis apparuissent, quæ postea in Apollodoro refulserunt, qui primus gloriam penicillo contulit. Vnde & picturæ secundam ætatem inchoabimus, à nonagesima tertia olym piade. cum antea nulla pictura admodum oculos tenuerit. Hic Apollodorus primus species exprimere instituit. Hunc sequutus Zeuxis picturæ portas intrauit, quas Apollodorus aperuerat. Fecit Penelopen, in qua mores eius pinxisse videbatur. Sed de pulchritudinis specie absoluta nondum inter artifices constabat. Itaque & ipse grandior in capitibus, articulisq; iudicabatur. Quocirca fluctuans adhuc cum pulchritudinis speciem nondum animo contemplatus esset, facturus Agrigentinis tabulam, quam in templo lunonis publice dedica-

dedicarent, virginibus eorum nudis inspectis, ex ijs quinque elegit, vt quod in quaque laudatissimum esset pictura redderet. Aequales eius, & æmuli fuere Timantes, Androci- des, Eupompus, & Parrasius. Primus hic symmetriam pi- cturæ dedit, primus argutias vultus, elegantiam capilli, ve- nustatem oris. Sed & in extremis lineis omnium artificum consensu laudem adeptus est. in medijs corporibus pingen- gendis non æque laudabatur. Maxime tamen nobilitatus fuit certamine illo, quo Zeuxidem superauit, ingenua ip- sius Zeuxidis confessione, quod is vuis pictis aues tantum fefellisset, sed Parrasius artificem ipsum flagitantem remo- to linteo ostendi picturam; cum tamen in ea tabula nihil præ- ter linteum pictum esset. Ea tunc penicilli laus fuit, rerum species accurate pingere. Ipse vero Parrasius à Timante su- peratus est in Aiace, armorumq; iudicio. Vnde moleste se ferre dicebat, quod Ajax iterum ab indigno victus esset. Hic Timantes artem viros pingendi artificio suo comple- xus est. Addidit præterea argutias picturæ, cum in eius o- peribus plus semper intelligeretur, quam pictum esset. Exemplis Plinius rem illustrauit. Eius inquit & Iphigenia, qua astante ad aras peritura, cum mæstos pinxisset omnes, præcipue patruum, & iam tristitiæ omnem imaginem con- sumpsisset, patris ipsius vultum velauit, quem digne non poterat ostendere. Addit de Cyclope dormiente in parua tabula, cuius magnitudinem exprimere cupiens, pinxit iu- xta satyros thyrso pollicem eius metientes. Ijsdem fere tem- poribus floruit Pausias Sicyonius. Is inquit Plinius eam pi- cturam primus inuenit, quam postea imitati sunt multi, æquauit nemo. Ante omnia cum longitudinem bouis osten- dere vellet, aduersum eum pinxit, non transuersum, vnde & abunde intelligitur amplitudo. Deinde cum omnes qui volunt eminentia videri, candicantia faciant, coloremq; con- diant nigro, hic totum bouem atri coloris fecit, vmbraeq; cor- pus ex ipsa dedit, magna prorsus arte, in æquo extantia osten- dens, & in confracto solida. Sed in his postremis verbis ma-

lim in contracto, quam in contracto. Nam in eo exemplo duo Plinius adnotare voluit. primum, quod umbra corpus dederit, non aliunde petito lumine quam ex ipsa umbra. Alterum; quod in figura contracta solidum corpus ostenderit. Euxenidus Aristide discipulo inclaruit, vt Eupompus Pamphilo, vt hic Appelle. Eupompus ea fuit auctoritate vt picturam, cuius antea duo erant genera, Hellanicum, & Asiaticum, in tria diuiserit, Atticum, Ionicum, & Sicyonium, ab autore sic dictum, cum esset sicyonius. Pamphilus omnibus literis eruditus ad seueriorem normam picturam reuocauit. Siquidem sine arithmetica, & geometria negabat artificem perfici posse.

Iam tot artificū manibus exculta ad suum finē peruenerat pictura, nec tamen adhuc species illa pulchritudinis in ea re fulserat, nondū eam inuiserat Venus. donec Apelles eam picturæ cōcilauit Olympiade cxij. Itaque cum eadē ætate præstantissimi pictores essent, omniū opera admirabatur, laudabat in genue. Cedebat Amphioni de dispositione, Asclepiodoro de mēsuris. de Protogene dicere solitus, omnia sibi cū illo paria esse, aut illi meliora, deesse tamen omnibus ijs illam Venerem dicebat, quam Græci Charita vocant. cætera omnia contigisse, sed hac sola sibi neminem comparandum. Honestam quidem oratio, sed qua sibi tamen in pictura principatum arrogabat. hac enim laude summam artis complexus, cæteris omnibus aliquid deesse notabat, sibi vni omnia contigisse. Hæc illa est idea pulchritudinis numeris omnibus absoluta, quam nemo præter eum assequi potuit. Euphranor dignitates heroum expressit, Aristides animum pinxit, & mores, Parrasius animi perturbationes. Sed aliud quiddam fuit ab his omnibus Venus illa, quæ Apellis opera commendabat. Mirum sane, potuisse artificem oculis subijcere, quod lingua eloqui non posset: nec posse quemquam verbis complecti, quod exigua tabella caperet. Idem etiam pinxit quæ pingi non possent: tonitrua, fulgetra, fulgura. Imagines autem adeo indiscretæ similitudinis, vt quidam

dam ex facie hominis addiuinans, quos metoposcopos vocant, ex ijs dixisse feratur aut futuræ mortis annos, aut præteritæ. Tam certo etiam successu similitudines expressit, vt Ptolomeo Regi cum eum nominare non posset à quo inuitatus venisset, accepto carbone è foculo imaginem in pariete delineauerit, agnoscente rege vultum protinus ex inchoato. Vnum inquit Plinius imitari nemo potuit, quod absoluta opera illinibat atramento ita tenui, vt id ipsum repercussu claritatis colorum vim excitaret, custodiretque à puluere & sordibus, ad manum intuenti demum appareret. Sed hæc postrema verba nō satis intelligo. quid enim hoc sibi vult ad manum intuenti demum appareret? quæ de num hic latet præstantia, quæ propria fuerit Apellis? Ego vero putarim hac claritate effectum fuisse, vt numen quoddam appareret intuenti. Itaque sic malim legere absoluta opera illinibat atramento ita tenui, vt id ipsum repercussu claritatis, colorum vim excitaret, custodiretq; à puluere, & sordibus, ac numen intuenti demum appareret. Lectoris esto iudicium. Porro præstantiam art ficiis vel hoc vnum testabitur, quod inchoatam Venerem Cois nemo inuentus est qui ad præscripta lineamenta operi succederet, morte prærepto eo antequam absoluisset. Est in rebus humanis quadam prodire tenuis, & definitus crescendi modus, quem Apelles arte sua inclusit. Itaque nemo postea inuentus est, qui artem prouexerit. Fuere postea nonnulli, qui deteriora sequuti, picturam ad res humiles reuocando, laudem tamen in eo genere meruerunt. ex quibus fuit Pyreicus, qui tōstrinas, & sutrinas pinxit, asellos, obsonia & similia. Laudatus fuit & Ludius diui Augusti ætate. Hic primus inquit Plinius instituit amoenissimam parietum picturam, villas, & porticus, ac topiaria opera, lucos, nemora, colles, piscinas, euripos, amnes, littora, qualia quis optaret. varias ibi obambulantium species, aut nauigantium, terraq; villas adeuntium asellis, aut vehiculis. Item piscantes, aucupantesque, aut venantes, aut etiam vindemiantes. Sunt in eius exemplaribus nobiles pri-

latri

lustri accessu villæ succolantium specie : mulieres labantes trepidæq; feruntur. Plurimæ præterea tales argutiæ, facetissimi sales. Idemque subdialibus maritimas vrbes pingere instituit, blandissimo aspectu, minimoque impendio. Sed nulla gloria artificum est, nisi eorum qui tabulas pinxere: eoque venerabilior apparet antiquitas. Hæc Plinius. Cæterum non exemplis tantum illustratæ fuerunt hæ nobilissimæ artes, sed & clarissimorum virorum scriptis. Ex latinis scripserant. Atticus, & Varro. hic nominibus septingentorum artificum insertis suis voluminibus. Ex Græcis Antigonus, & Xenocrates. & Pasiteles fictor, quinque editis libris nobilium operum, quæ essent toto orbe. Euphranor Isthmius pictor composuit libros de symmetria, & de coloribus. Apelles libros edidit de sua arte, quibus saltem fata parcere debuerant, tot alijs nobilibus eius operibus absumptis.

ILLVSTRISSIMO
ET REVERENDISSIMO D.
CAROLO RAMBOLIETO S. R. E.
CARDINALI AMPLISSIMO.




OLENT pictores in vltima regione tabulę montes, vrbes, nemora, amnes, aut alia quędam eiusmodi, vasta licet argumenta, angusto loco premere, & tanquam ab oculo recedentia obscurius repręsentare. Sic cum ego accuratius paulo quędā in hoc opere descripsissem, hæc præterea, quę iam dudum longum temporis intervallum oculis subduxit, in hac vltima libelli parte, quę tibi à prima operis designatione dicata est, non graphice delineare, sed adumbrare institui. nec tam formam ipsam rerum, quam earum speciem, & situm ostendere. Non vique ad eò aspernandum opus si pusillum videtur. Contractius fortasse quidem, quam par fuit. Sed si tibi breue videbitur, bene est, dum proluxę erga te meę voluntatis, & obseruantię testimonium, & perenne monumentum agnoscas.

Amplitudini vestre

Deditissimus ser.

Iud. D. M. V. f.

I
LVDOVICI DEMONTIOSII
 GALLVS ROMÆ HOSPEs.
DE FORO ROMANO VETERI,
 ET ALIIS QVIBVSDAM LOCIS
 CIRCvNSTANTIBVS.



SAEPE miratus sum, potuisse adeo mutari antiquæ vrbis faciē, vt de celebrioribus operibus quæ in ea quondam fuerunt, hodie passim dubitetur vbi nam sita fuerint. De arcu Fabiano ostēdimus, aut eum esse qui tempore Caracallæ renouatus nunc arcus argentariorum appellatur, aut ei vicinum fuisse. Quum ex inscriptione, quæ Zophoro incisa est, constet iuxta eum fuisse lanum, celebrem illum mercatorum, & fœneratorum locum, qui olim arcu Fabiano notabatur, vt nunc eo vice versa Fabianus arcus. Sed quando iterum ad arcum Iani, & ad Fabianum disputationis nostræ caput reuoluitur, libet hic quædam de ijs in gratiam studiosorum adnotare. Arcus scilicet omnes lanos olim dictos fuisse. quod ex parte anteriore & posteriore instar Iani gemini conspiciēdi essent, eodem argumento atque lanus geminus. vt scilicet gemina illa facie præteritorum memoriæ consulerent, & eorundem posteros admonerent. Sed quum virtuti cuiusdam illustis viri dicabantur, appellabantur arcus. vt arcus Titi, arcus Septimij, Constantini, Gordiani, & similium. Quum vero argumentū quoddam reconditum continebant, tunc Iani communi nomine appellabantur. vt lanus hic, qui ad arcum Fabianum: de quo illud apud Ouidium.

Qui puteal, Ianumque timet, celeresque calendas.

Dictum propter occursum fœneratorum, qui in Iano fre-

LVDOVICI DEMONTIOSII

quentes diuersabantur. Tametsi non semper eam differentiam seruarint scriptores. Nam cum P. Victor Ianos quadrifrontes triginta sex in vrbe fuisse dixisset, per omnes regiones marmoribus incrustatos, & adornatos insignijs militaribus, & signis. alio deinde loco totidem arcus marmoreos fuisse scribit. Et quos Ianos quadrifrontes appellat P. Victor, eosdem Suetonius in Domitiano arcus appellauit. Ianos inquit arcusq; cum quadrigis. & insignibus triumphatorum per regiones vrbs extruxit. Cicero pro arcu fornicem dixit 2. de Orat. etiã illa ridentur, inquit, quæ minuendi, aut augendi causa ad incredibilem admirationē efferuntur. vt tu Crasse in concione, ita sibi magnum videri Memmium, vt in forum descendens caput ad fornicem Fabij demitteret. de hoc enim arcu Fabiano intelligenda sunt hæc apud Ciceronem. Vnde & conijci potest altius olim patuisse; sed cum renouaretur, angustiores, & humiliorem factum. per eum etiam à capitolio in forum descensum fuisse. Quocirca quum Victor dicat, Ianum ad arcum Fabianum situm fuisse, non abs re & nos arcum Fabianum iuxta Ianum, in radice capitolij, foro imminetem descripsimus. Cum male recentiores eum in via sacra, iuxta templum Faustinae locent. Siue enim duo Iani fuerint, vt quidam existimarunt, siue is tantum qui à nobis descriptus est à duobus Ianis sic appellaretur, arcus Fabianus non longe distabat ab hoc.

Hic error alios etiam errores in fori Romani descriptionē induxit. Nam si hæc ita sunt vt dixi, pariter erratum est à recentioribus antiquarijs in situ putealis Liboniani. & Comitij. quum & puteal Libonis Porphyrio ad arcum Fabianū fuisse scribat. Itaque quum constet puteal situm fuisse in comitio, perperam vtrumque ab iisdem locatur iuxta arcum Titi. Sed et ficus ruminalis, & Lupercal in comitio fuerunt teste eodem P. Victore. Adde rostra eodem loco fuisse, rostra inquam noua, & curiam Hostiliam, eam scilicet quæ fuit sub veteribus, & Græcostasim auctore Varrone: quum libr. 5. de lingua Latina dicat ante curiam Hostiliam fuisse Rostra, è Comitio

mitio locum substructum Græcostasim appellatum, vbi nationum subsisterent legati, qui ad senatum missi essent. Deniq; & forum Romanum, quod magnum dicebatur, inter hæc interiucuisse fatendum erit: quum tamen hæc omnia ex sententia recentiorum adseribantur ei spatio, quod est ab arcu Septimij, ad arcum Titi, quod vulgo campo Vacino nūcupatur. qui locus sane non fuit accommodus foro. quum ab arcu Titi, ad arcum Septimij locus nimium accliuus esset. vt vel inde iudicare licet, quod arcus Titi hodie totus a fundamētis conspicitur, arcus vero Septimij ad dimidiam fere partem altitudinis terra obrutus sit. et tamen locus adhuc ab illo, ad hunc totus accliuus est. Sed aiunt vestigia quædam rostrorum ibi reperta fuisse, quum inde aliquando terra effoderetur. et ego quoque non negauerim ibi fuisse rostra vetera, sed noua ad arcum Fabianum fuisse dico. Hæc non docendi, sed admonendi causa dicta velim quæ lubens obmisiſsem, nisi vidissem in parte vrbs celeberrima, membra adeo luxurata, & diuulsa esse, vt qui fuerit olim situs nobilissimarum eius partium nemo meminerit.

De Basilica Pauli notum est, quantum celebrata fuerit, quàm magnifica describatur. vt pote in cuius extruccionem immensam argenti vim erogata fuisse dicant. opus Plinij suffragio præferendum omnibus Aegyptiorum, & Græcorum, paucis Romanorum postponendum. Et tamen vbi sita fuerit nescitur. In ea Romæ descriptione, quam Vaccarius paucis ab hinc annis Duperaci typis excudendam curauit, basilica de qua nunc agimus, sita est in radice montis Quirinalis, qua parte spectat Capitolium. vbi vestigia quædam conspiciuntur cuiusdam antiqui ædificij hæmicycli formam referentis, non multum dissimilis ab ea, quæ in theatris vsurpabatur. sed non prorsus eiusdem: vt certe theatrum non fuit. quum in ea regione vrbs nullius theatri meminerint scriptores. nec spectaculis satis accommodata figura videatur. Vnde ij qui ex vestigijs antiquorum operum pristinae formæ Romam restituere voluerunt, existimant ibi quondam sitam.

sitam fuisse Basilicam Pauli, quum in ea regione eam fuisse constaret, & ratio operis non inelegans videretur. Atqui ipsius operis forma non conuenit cum ijs quæ Vitruuius scribit de basilicis, quum tamen eius temporibus extructa fuerit. Sed demus plures fuisse basilicarum formas. ex his quæ supersunt nemo existimauerit tot sumptus in eius extructionem erogari potuisse, quum opus fuerit lateritium. Sed nec video quo pacto columnæ illæ ex marmore Phrygio, quæ in eo laudabantur apposite ibi statui potuerint, nec cur adeo opus ipsum debuerit tantopere commendari.

Sunt verò qui dicant hanc basilicam sitam fuisse inter templa Saturni, & Faustinae. quumq; diruta esset, ex eius ruinis postremum hoc templum extructum fuisse. Argumēto esse columnas porticus ex marmore Phrygio. Sed columnæ non sunt eius magnitudinis, vt propter eas Basilica Pauli inter orbis mirabilia reponenda fuerit. Hæc dum sæpius mecum animo repeto, & omnia vicina loca oculis lustro, aspicio forte columnam stantem, ex marmore Phrygio, eximie magnitudinis, terra obrutam ad tertiam fere partem altitudinis, sitam iuxta ecclesiam, quæ vulgo Spoglia Christo nuncupatur, qua parte oriētem spectat, quæ interim, dum hæc scriberem, inde sublata est a Ioanne Georgio Cæsarino, qui paulo post è viuis excessit, cui Romano nobili, & dum viueret antiquarum rerum studiosissimo, vt qui eas haberet in delitijs. Vxor eius probissima, & filius magnæ, vt fertur, virtutis indolis, defuncti votis indulgentes ambo, paucis abhinc diebus deuehendâ curarūt in vineam refertam varia antiquarū huiusmodi rerum suppellectile: atque eo nomine in primis vendendam: quæ sita est ad D. Petri in Vincula. Quum igitur columnam illam, vnicum illius celebris Basilicæ vestigium, antiquo suo loco moueri viderem, ne huius loci memoria intercidere, situm eius in gratiam posteritatis consignare volui. Vidi præterea, cum inde tolleretur, effodi eius capitulum & basim, operis Corinthij. Sita autem erat inter priorem illum locum a nobis descriptum, & alterum, qui a recētiore pro Basilica

GALLVS ROMAE HOSPES.

Basilica Pauli agnoscitur. Vnde conieci ibiquon dam sitam fuisse nobilem illam Basilicam Phrygijs columnis spectabilem, e quibus hæc tantum reliqua est, ex cuius magnitudine totius operis magnificentia existimari possit, & forma eius restitui ad præscriptum Vitruuij. Est autem columnæ lōgitudo 47 palmorum dodrantalium, præter capitulū & basim. Aedificium autē illud quod falso creditum est fuisse basilicā Pauli ad radicē Quirinalis, vbi adhuc vestigia antiqui operis conspiciuntur, ni fallor, illud est quod P. Victor stationes municipiorum appellauit. vbi qui à municipijs Romam missi erant, vt Senatui quædam exponerent, subsisterent, quemadmodum in Græcostasi legati nationum. Nam ex eo quod superest de antiquo ædificio iudicari potest in similem quādam vsum quondam paratum fuisse, cum in eius hemicyclij curuatura plures sint continuæ cameræ, singulæ suis fornicibus tectæ, & locus satis accommodus fuerit, si ex ijs, quæ supersunt reliqua existimare velimus, & quæ supra erant, quorum adhuc extant vestigia, & quæ subter latent. Ibi hodie sita est domus Camilli Cucini equitis Lusitani, & Mutij fratris eius, qui comiter & benigne adeuntes excipiunt.

Hæc si ita sunt, de vna fidelia duos parietes dealbauimus Nam & celebris illius basilicæ Pauli locum indicauimus, qui iam tot annos omnes latuit, & eadem opera stationes municipiorum ostendimus. nec sane labore pœnitendo, si ex sententia successerit cum nihil magis in votis habeam, quam de hac inclyta Vrbe studijs meis quodammodo promereri.

REGISTRVM.

PARS Prima, Ludouici Demontiosij Gallus Romę hospes.

Dum Romę agens, &c. A B C D.

PARS II. Illustrissimo, & Reuerendiss. Principi Aloysio Estensi, &c.

Ludouici Demontiosij Gallus Romę hospes. De Pantheo, &c. A B C D.

PARS III. Illustrissimo, & Reuerendiss. D. Francisco de Gioiosa, &c.

Ludouici Demontiosij, Comentarij de Sculptura, &c. A B C.

PARS IIII. Illustrissimo, & excellentissimo D. Anna de Gioiosa, &c.

Pictura. A B C.

PARS V. Illustrissimo, & Reuerendissimo Carolo Rambolieto.

Ludouici Demontiosij Gallus Romę hospes. De Foro Romano. A.



ROMAE

Apud Ioannem Osmarinum Liliotum. M. D. LXXXV.

Cum Priuilegio, & Superiorum permissu.

first single of

Veh: Oldham, Chas, x1, 1620

Schmidt, 790

Is there

Mittens

6 ft in mine, 2 slope

SPECIAL 93-B
5867

